

1 Kolini

Polo'a Efesusi kumate maineno mani avona Kolini kumate maine'ya Yisasife havi'ya amakupi malenaya vea'mogamife kae-malene. Yisasi'a faliteno hetino ikapinaga haitegeno Polo'a tueti tali'a (23) kafu agava maineno 1 Kolini kea kae-malene. Ani vea'mo'ya hagote'ya avona kae'ya havigageno kenona'amile mani avona kaeno amamine.

1-2 Nagaya Polo'nae. Anumaya Kotina haigeno nagaila hapalinateno “Yisasi Aposolo kano maiyo.” huno humaineafe nagayaene taganatimo'a Sosetenesi'ene mani avona kaeta'a Kolini mainetama Yisasi kea tamametiti hutama Yisasi Kalaisi'ene ailokaetama mainayafe alu aotage vea'ne mainae. Muki'a kotega vea'nene Anumayatimo Yisasi Kalaisi agile nunamu nehaya vea'nene tamakaife'enenaga'ai'a alu aotage vea'ne'a maisayafene huno hapalilamatene. Yisasi'a amakai'ene tagai'ene Anumayatimo maine.

³ Anumaya Koti'a, Nelafa'ene Yisasi Kalaisi Anumayatimo'ene kayone hisaya ya'ene tamaipa falu hisia ya'ene tamamisa'e.

Polo'a nunamu huno muse humaine.

⁴ Yisasi Kalaisi'ene ailokaetama maigeno Anumaya Koti'a agai'a kayone yama'a tamamineafene hu'na nagaya muki'a kanafina tamakaifena Anumayamotega muse hu'na

nunamuna nehue. ⁵⁻⁶ Kalaisi kea ago
 tamahapaugetama havilama hulinetama
 ani keleti Anumaya Kotifema havitama
 tamakupi malayana Yisasi'ene ailokaetama
 maigeno Anumaya Koti'a muki'a tokiya'a ago
 tamamineanagitama nago'a vea'mogamina
 mani kea hamapaisaya tokiyatamia hane.
⁷ Haneanagi meni kanafina Anumayatimo'a
 Yisasi Kalaisi'ma ikapinagati elavino fufu
 yate'ma esiafe tamametitia hutama agava
 mainageno Alu Aotage Avamu'mo'a tokiya
 yama'a kasago'ya tamamineana-gitama nago
 yafena aupa nohae. ⁸ Yisasi'a tokiya vaitama
 maisaya yana tamamisigetama tokiya vaitama
 mainetama ma mopama ha'no hisia yupa
 kefo yatamia omalenageno Anumayatimo'a
 Yisasi Kalaisi'ma kaiyeke hulamatesia yupa
 kanale'ya hutama hetigahae. ⁹ Anumaya Kotina
 nafa'ne'amo'a Yisasi Kalaisi'e Alatimo'ene
 nagoke tamaipale maisayafe tamakaila ke
 huno "Na'a hugahue." huno hulamatenea kea
 o'atalegahianagino ani kavala hugahie.

*Yisasifema havi'ya amakupi malenaya
 vea'mo'ya apase'ya mainae.*

¹⁰ Nafu'nagana-gatama Alatimo'a Yisasi Kalaisi
 agile tokiya'age kea tamahanepauve. Nago'a
 tamakesa havitama alu ke alu kea ohutama
 apaohetama mainetama nagoke tamaku
 tamakesale maiho hu'na tamahanepauve.
¹¹ Nafu'nagana-gatama Koloe anaga'mo'ya
 tamakaifena mage hu'ya nahapaiye "Amakaya

ke vaige vaige yate nemaiye.” hu'ya nahapaiye. ¹² Tamakaya ani kema ne'vaiya yana nagoke'mogatama “Tagaya Polo vea'ne mainone.” hutama hage'ya nago'amogatama “Tagaya Apolosi vea'ne mainone.” hutama hage'ya nago'amogatama “Tagaya Pita vea'ne mainone.” hutama hage'ya nago'amogatama “Tagaya Kalaisi vea'ne mainone.” hutama nehae. ¹³ Na'a higetama ani kea nehae? Kalaisi augafamo'a akalu kale-peno haote haote humaineo? Nagaila Polonina tamakaife hu'na yafaga yosale nahae'ya asaige'na fali-maino? Ifi nagaila Poloni nagile tina fale-lamatenao? A'ao tamakaya “Ma kanomo mono ke nehavuna vea'ne mainone.” hutama ohiho.

¹⁴ Tamakai amu'nopina Kalisipusi'ene Kaiyusi'ene tina falenatenoe. Nago'amogamina fale o'amatenoa yafena muse nehue. ¹⁵ Havigu nago'a vea'mo'ya “Polo agile tina falelatenae.” hu'ya hisagi. ¹⁶ Tamage nagaya Setefanasi nofi anaga'ene tina falematenoe. Nago'a vea'nenena falematenesuo fale o'amatenesuo nagesa ohavinoe. ¹⁷ Kalaisi'a tina falelamatesuafene huno hunatege'na omenogi agai'a hulatenea yafe kanale mono kema huhale'na tamahapaisuafene huno hunatene. Mani kea ma mopafima kanalehavi'ya'ami hanea vaya'mo'ya nehaya augafa kema hisuana Yisasi Kalaisi'a yafaga yosale'ma fali-mainea kemo'a afa ya kana hu yafenagi'na na'a augafa kea ohugahue.

Kalaisi'a Anumaya Kotina tokiya'a maine.

¹⁸ Hani yapi, tegelege nehia atafi, visaya vea'mo'ya Yisasi'a yafaga yosale'ma fali-mainea kehena “Havigu-nagu ke nehae.” hu'ya ne-hayanagi tagaya Anumaya Koti'a tagu tamema ali negatea vea'mogata Yisasi'a yafaga yosale'ma fali-mainea kemo'a “Anumaya Kotina tokiya'ae.” huta nehune. ¹⁹ Anumaya Koti avopina mage huno kae-maleneane

“Nagaya muki'a kanale havi'ya'ami hanea vea'mogamina havilinaya yana alitalesugeno fanane hugahie. Kanale amaku amakesama hanesia vea'mogamina amaku amakesa ali ha'no hutalegahue.” huno Anumayamo'a humaineane.

²⁰ Kanale havi'ya'amima hanea veafena na'ane hisune? Kahegi kema havilinaya veafena na'ane hisune? Ma mopale yafema amakemo'ma nehaya veafena na'ane hisune? Anumaya Koti'a ma mopale yafe kanale havi'ya'amima hanea vea'mogamifena “Havigu-nagu ke nehae.” huno humaine.

²¹ Anumaya Koti'a tusi'a kanale havi'ya'a hanea kanogino agai'a haiya kava huno “Ma mopafi vea'mo'ya amakai'ami havi'ya'amima hanea yateti nagaila nagelama hu'ya onagegahae.” huno huteno haiya agesa mage huno havimaine “Yisasi'a hulatenea yafena kanale mono kea, huhaletama hamapaiya kema havi'ya amakupi male'ya amametiti humainaya vea'mogamina amaku amamena

aligatigahue.” huno humaine. ²² Yuta vea¹mo¹ya “Tokiya¹age avame yana hisanageta ageteta Kalaisife havita lagupina malegahune.” hu¹ya hage¹ya Kaliki vea¹mo¹ya “Muki¹a yana havita kanale havi¹yatiene vea¹ne maisune.” hu¹ya hae. ²³ Hayanagi tagaya Kalaisi¹a yafaga yosale¹ma fali-mainea kema huhaleta hamanepaunana Yuta vea¹mo¹ya tagaifena “Tayo hia ke nehae.” hu¹ya amakave¹no hutage¹ya Yuta vea omainaya vea¹mo¹ya “Ani kea havigu-nagu ke nehae.” hu¹ya humainae. ²⁴ Hayanagi tagaila Anumaya Koti¹ma hapalilatenea vea¹mogata, Yuta vea¹nene Yuta vea omainaya vea¹nenena, ago havimainone Kalaisi¹a Anumaya Kotina tokiya¹agino kanale havi¹ya¹a hanea kano maine. ²⁵ Anumaya Kotifena “Havigu-nagu agu agesa hane.” hu¹ya nehayanagi muki¹a mopale vea¹mogamina havi¹ya¹ami amakase-maine. Anumaya Kotifena “Nago¹a fulu fulu yama¹a hane.” hu¹ya nehayanagi ani fulu fulu yama¹amo¹a ma mopafi vea¹mogami tokiya¹amimona amakase-maine.

²⁶ Nafu¹nagana-gatama Anumaya Koti¹a tamakaila hapalilamatenea yupihe tamakesa havi havi hutama haviho. Tamakai amu¹nopina ma mopale kanale havi¹ya¹ami hanea vea¹nene mopale tokiya¹amima hanea vea¹nene amakima hanea vea¹mogami nafa¹neyagaene kasago¹ya omainayane. ²⁷ Omainagi havi¹ya¹ami hanea veala amakaye hisiafe Anumaya Koti¹a ma mopale yafe havi¹ya¹ami omalenea

vea'nea hapalimatene. Tokiya'amima hanea vea'mogamina amakaye hisiafe ma mopale fulu fulu nehaya vea'nea hapalimatene. ²⁸ Ma mopafina amaki hanea vea'mogami tokiya'amia heno fanane hugahe ma mopafina amaki omale vea'nene “Afa vea'ne mainae.” hu'ya haya vea'nene hapalimatene. ²⁹ Nago kanomo'a Anumaya Koti aulina augafa alino nehaino agai'ahena “Nagaya nagi hanea kano mainoe.” huno ohisiafene huno Anumaya Koti'a ani'a augafa veala hapalimatene. ³⁰ Anumaya Koti'a agai'a “Yisasi Kalaisi'ene ailokaetama maiho.” huno nagopi alino ailokaelateneafe Yisasi Kalaisi'a tagaya havisuna tagu tagesamona aepa'a maine. Yisasi'a hulatenea yateti Anumaya Koti'a havi yapitila ago miya hulateneo tagaifena “Fatago vea'ne mainae.” huno hulateteno alu aotage au'ava yama hisuna tokiya'a tamine. ³¹ Ani yama hulatenea yafena Anumaya Koti avopina mage huno kae-maleneane
 “Nago kanomo'a agai'a agima alisaga hisia age-sama havinuno'a ne'ataleno Anumayamo agi alisaga huno musena hino.” huno humaineane.

2

Polo'a Kolini vea'mogami amametitihe hu-maine.

¹ Nafu'nagana-gatama nagaya nayona tamakaite Anumaya Koti kema me lamahapauvana havi'ya'ami hanea vea'mo'ya

nehaya avamete hu'na tamaipafinaga tamahaisifa kea tamahaopainoe. ² Nagai'nia nagu'afinaga mage hu'na havimainoe “Nagaya tamakai amu'nopima mainoana nago'a yafena tamahaopaigahue. Nagaya Yisasi Kalaisi'a yafaga yosale'ma falimainea yafeke'ya tamahapaigahue.” hu'na humainoe. ³ Hagote'na tamakai'enema mainoa kanafina foli foli hu'na koli nehu'na atali hu'na mainoe. ⁴⁻⁵ Atali nehu'na Anumaya Koti tokiyahe havitama tamakupi maletama tamametiti hisae hu'na ma mopafi havi'ya'ami hanea vea'mo'ya nehaya augafa kea ohunogi Avamu'mo tokiyaleti kea huhale'na tamahapai-mainoane. Havi'ya'ami hanea vea'mo'ya nehaya kehena tamametitia ohisae hu'na Yisasifena kanale mono kea humainoe.

Anumaya Koti Avamu'mo'a kanale tagu tagesa nelamie.

⁶ Anumaya Kotina amaku'a amitafa hu'ya akave nemalaya vea'mogamifena tokiya'age kea nehuanagi ma mopafi havi'ya'ami hanea vea'mogami augafa kene, ma mopafi kava yagai-mainaya vea'mo'ya nehaya augafa kene, fanane hisia kea nohue. ⁷ A'ao, tagaya Anumaya Koti agu agesamo'a falaki-mainea ke tamahanepaune. Anumaya Koti'a ma mopama talo ohuneno'a hagoteno nago kea humainegeni falakino haneanagino menia lagaya Anumaya Kotitegati tokiya hale yama'a alisunafe mani kemo'a falote humainone. ⁸ Ma mopafi kava vaya'mo'ya mani kemoni aepa'a ohavinae. Mani kema

havimainasina tokiya hale yamo aepa'a hanea kanoa, Anumayamona, yafaga yosalela nilia he'ya o'asaisine. ⁹ Anumaya Koti avopina mage huno kae-malenayane

“Taulagamo'a o'agenea ya'ene tagesamo'a ohavinea ya'ene vea'mogami amaku amakesafiti omalenea ya'enena Anumaya Kotina amaku'ama aminaya vea'mogamife talo tala humalene.” hu'ya kae-malenayane.

¹⁰ Vea'mo'ya o'agageno falakino hanea kea Anumaya Koti'a agai'a Avamu'aleti taveli-maine. E, Alu Aotage Avamu'mo'a muki'a yana atiyeno Anumaya Kotina falakino hanea agu agesaene agemaine. ¹¹ Hana vea'mo'ya nago kanomo'ma agesama nehavia yana agemaine? A'ao o'agenagi agai'a agupima mainea agu nafa'moke'ya agemaine. Ani kava huno nago'a vea'mo'ya Anumaya Koti'a agu agesafima havia yana ohavinagi agai'a Avamu'moke'ya agemaine. ¹² Anumaya Koti'a ma mopafi vea'mo'ya nehaviya amaku amakesa notamigi tagai'ma Anumaya Koti'a taminea kema havilama huta havisunafe ani Alu Aotage Avamula tamigeta avale-mainone.

¹³ Tagaya mani kea huhaleta nehune. Ma mopale kanale havi'ya'ami hanea vea'mogami ke kana huta nohunagi Avamu'mo tahapaiya kege'ya tamahanepaunageno ani Avamu'ma amakupi mainea veafeke'ya sili huta hamanepaune. ¹⁴ Hamanepaunanagi

Alu aotage Avamu'mo'ma amakupi omainesia vea'mo'ya ani Avamu'mo kea havi'ya akave malesaya amuko'amia omaleneanagi'ya “Mani kea havigu-nagu ke nehæ.” hu'ya nehu'ya Avamula o'avalenayanagi'ya aepa'a havisaya amuko'amia omalene. ¹⁵ Alu Aotage Avamu'ma amakupi mainea vea'mo'ya muki'a aepa'a haviya yamona fako hugahayanagi nago'a vea'mo'ya agaifena “Na'a kano mainane.” hu'ya fako hu o'ategahæ. ¹⁶ Anumaya Koti avopina mage huno kae-maleneane

“Anumayamo nehavia agu agha hana'a vea'mo'ya haviline'ya Anumayamo ali'ya alisia yafena hapaigahæ?” huno humaineane.

Na'a ohugahagi Kalaisi'a agai agu agha ago tahapaino tamigeta agai kemo aepa'a havilinone.

3

Mono ali'ya vayala Anumaya Koti ali'ya vaya mainae.

¹ Nafu'nagana-gatama tamakai'ene maine'na, Avamu'mo'ma amakupi mainea vea'mo'ya havisaya avamete kea ohunogi tamakaya atafa lamaipale, osi nafa'ne kana hutama mainage'na Kalaisi humainea au'ava yafema nohavinaya vea'mogami avamete kea tamahapai-mainoe. ² Tamakaya tokiya'age kema hisua kea ohavigahayanagi'na nu tamamisua avamete ke tamahapai-mainoe. Meni kanafi'enena ani'a hu'na nu tamamisua avamete ke

tamahanepauve. ³ Na¹afene atafa lamaipamo akave maletama mainetama tamafu-tamakana-gamifena tamaipa haviya humatetama kema vaimatayana atafa lamaipa hanegetama ma mopafi vea¹mo¹ya nehaya kavake¹ya nehae. ⁴ Nago¹amogatama “Polo tahapaiya kele akave nehune.” hutama hagetama nago¹amogatama “Tagaila Apolosi tahapaiya kele akave nehune.” hutama nehae. Ani kava¹ma nehayana ma mopafi vea¹mo¹ya nehaya avamete kava nehae.

⁵ Apolosi¹a hana¹a augafa kanoe? Nagaya Polo¹na hana¹a augafa kanoe? Ta¹agaya ali¹ya kanolatake maino¹e. Anumaya Koti¹a alu ali¹ya lu ali¹ya ta¹amigeta¹a ne¹alu¹e. Ani ali¹yateti tamakaya Yisasifena havitama tamakupina maletama lamametitia humainae. ⁶ Nagaya Yisasi kea tamakupina fai-maletogeno Apolosi¹a tima¹a hefino taki-maleneanagi Anumaya Koti¹a agai¹age alino aifalo higeno hagemaine. ⁷ Na¹a humainegi avina yama fai-malenea kanomo agiene tima taki falu hu-malenea kanomo agienena omalegi avina yama alino aifalo higeno hage-mainea kanoa, Anumaya Koti agige¹ya alisaga hisune. ⁸ Anumaya Koti kema faimalenea kanoene tima takino falu humalenea kanoene nago ali¹ya alimaina¹e. Ani ali¹yatetila tolemogania ali-maina¹a avamete anona¹ania aliga¹e. ⁹ Ta¹agaya Anumaya Koti¹ene ailokaeta¹a ali¹ya kanolatama¹a maino¹e. Tamakaya Anumaya Kotina hoya¹a kana hutama mainae. Tamakaya Anumaya Kotina noma¹a kana hutama mainae.

Mono ali'ya vea'mo'ya kamuta vaya kana hu'ya mainae.

¹⁰ Tamakaya Anumaya Kotina noma'la mainage'na Anumaya Koti'la kayone yama'aleti nagaya no ki ali'yate kava kano maine'na yafateti tunagea ago ayemalenoge'ya nago'la vea'mo'ya nona negiye. Muki'la vea'mo'ya amakesa havilama hute'ya kanale'ya hu'ya kiho.

¹¹ Anumaya Koti'la tokiya'age no yosamo'ma noma atafa nehia yosa Yisasi Kalaisina agai'age ategeni maineanagi'ya nago'la vea'mo'ya alu tokiya noma atafa hisia yosa o'ayegahae.

¹² Nago'la vea'mo'ya haya keleti ani nona tokiya'age huno falu otesia yosaleti'ene u yosaleti'ene yafateti'ene negiyanagi nago'la vea'mo'ya hofaleti'ene vitimo alapaleti'ene aupa'la kasalisia yateti negiye. ¹³ Negiyanagino Anumaya Koti'la kaiyekema hulatesia kanafina muki'la vea'mogami ali'yamo aepa'la haote haote huno atamo anefe'mo avame humateno amakege amakege hutesige'ya ali'yama ali-mainesaya ali'yamo aepa'la fufu yate ali falote hugahie.

¹⁴ Nago'la vea'mo'ya tokiya'age u yosaleti kimalenaya avamete hu'ya kimalenesaya no'amimo'ma atama otesigeno kanale'ma huno hanesiana ani vea'mo'ya kanale miyana anona'amia aligahae.

¹⁵ Aligahagi nago'la vea'mo'ya ki-malesaya no'amimo'ma atama lesigeno'la muki'la ali'yama'amimo'a fanane hugahianagi atafiti vea'ma ali vati huna avamete huno amakai'ami amaku amamena

aligatisige¹ya maigahayanagi¹ya anona¹amia
o¹aligahae.

*Tamakaya Anumaya Kotina alu aotage noma¹a
mainae.*

¹⁶ Tamakaya Anumaya Kotina alu aotage
noma¹a mainageno Anumaya Kotina Alu Aotake
Avamu¹amo¹a tamakupina maine. Tamakaya
ani yana havilama ohunao? ¹⁷ Nago¹a vea¹mo¹ya
Anumaya Koti¹ma mainea noma¹ama ali haviya
hisayana Anumaya Koti¹a amakaina ali haviya
humategahie. Anumaya Koti noma¹a alu aotage
nona haneanagitama tamakaya ani nona mainae.

Vea¹mogami amakia alisaga ohisune.

¹⁸ Havigu tamakaitamihe havige ayemavataga
hisagi. Nago¹amogatama “Mopafi vea¹mogami
havi¹ya¹miene vea¹ne mainone.” hu¹ya hisayana
na¹a amaku amakesa atalete¹ya amakesa
nohaviya vea kana hu¹ya maisayana kanale
havi¹ya¹miene vea¹ne maigahae. ¹⁹ Ma mopafi
havi¹ya¹ami hanea vea¹mo¹ya Anumaya Koti
aulagafina amakesa nohaviya vea¹ne kana
humainae. Anumaya Koti avopina mage huno
kae-maleneane

“Ma mopale havi¹ya¹amiene vea¹mo¹ya
savale¹age nehageno Anumaya Koti¹a
vea¹mo¹ya kalifuma hanagi-malene¹ya
neha¹yafiya avamete huno amatafa
nehie.” huno humaineane.

²⁰ Nago¹ene mage huno humaineane

“Anumayamo¹a haviana ma mopale
havi¹ya¹amima hanea vea¹mo¹ya nehaviya

amaku amakesamo¹a afa ya kana humaine.” huno humaineane.
²¹ Na yafe “Ma veala kanale vea¹ne mainae.” hutama amakia alisaga ohiho. Anumaya Koti¹a muki¹a yana tamamine. ²² Polo¹nagi, Apolosi¹agi, Pita¹agi, ma mopaene tamahaimu¹ene, fali ya¹ene, meni kanaene, haenagama falote hisia kanaene, muki¹a yana Anumaya Koti¹a tamamine. ²³ Tamamigetama tamakaya Kalaisi ayapi maigeno Kalaisi¹a Anumaya Koti ayapi maine.

4

Anumayamo¹a agai¹a ali¹ya vaya¹amogamina fako nehie.

¹ Yisasi kema tamahanepauna vaya¹mogatihena mage hu¹ya hisae “Yisasi Kalaisina ali¹ya vaya¹amo¹ya maine¹ya Anumaya Koti¹a nayoma falaki-malenea kea yagai-maine¹ya huhale¹ya nehae.” hu¹ya hisae.
² Kavayagaisaya veafena “Efi efi hutama ali¹yana aliho.” huno humaine. ³ Tamakayaene nago¹a vea¹nene nagai¹ma fako hutama nagaya kanale¹ya hu¹na tamahanepauvo havi kava hu¹na tamahanepauvo hutama hisaya yafena kolia nohue. Nagai¹nia nehua yafena nagai¹ni¹a fakoa nohugi Anumayamo¹a agai¹a fako hunategahie. ⁴ Nagaya agoana “Fatago ali¹ya kano mainoe.” hu¹na nehuanagi Anumaya Koti aulagafina fatago ali¹ya kano maino ifi omainoe huno Anumayamo¹a agai¹age “Na¹a

humainane.” huno nagaila fako hunenate.
⁵ Kaiyekema hulatesia kanamo'a yaufa falote ohuneanagitama tamakaya veala alitama “Na'a kavala havi kava nehae.” hutama hu o'amateho. Anumayamo esia kanafina agava mainesageno muki'a vea'mo'ya kefo yama, hani yapi falaki-mainea yana, Anumaya Koti'a hale yate alino falote hugahie. Anumayamo'a agai'a amahaote amahaote amaku'a amaketeno “Kanale humainao kefo ya humainao.” huno agai'a alino fako huteno vea'mogamina humainesaya avamete Anumaya Koti'a agai'a muse yana amamigahie.

Kolini mainaya vea'mo'ya amakai'ami amaki alisaga humainae.

⁶ Nafu'nagana-gatama tamakaya havisae hu'na nagai'ene Apolosi'enema alitama fako ohisaya kea nehu'na kaana tamave-nelue. Anumayamo avopifena mage hie “Okaenesaya kea ohiho.” hu'ya humainaya kea havitama akave nehutama nago'a vea'mogami amakia alisaga nehutama nago vea'mogami amakia ali haviya nehaya kavala ohiho. ⁷ Tamakaya muki'a vea'ma mainaya avamete hutama mainagi alu'a avametela hutama o'amakasenagi muki'a yana Anumayamo'a tamamineanagi na'a higetama “Nagai'ni'a ani yana ali falote nehue.” hutama tamakesa havitama tamaugafa alitama nehaiye?

⁸ Tamakaya ma ke hutama nehao? “Tagaitigeke'ya Yisasi kema havuna kea hai havimainone. Polo'ene Apolosi'ene mani kea

tahapai'ageta ohavinonagi tagaitige'ya hai havilineta sauve vea'ne mainone.” hutama nehao? Ani kava'ma humainele'asina ta'agai'enena ani'a huta'a sauve vava kana huta'a maino'ale'asine. Tamage tamakaya ani avamete vea'nea omainae. ⁹ Nagaya ma nagesa nehavue Anumaya Koti'a tagaila Aposolo vayala haenagalafa maisunafe hulatene. Nayoma kame vava'ma hamaegahe amavale'ya kumate emainage'ya amakete'ya kigi hu ne'amataya avamete kava nehageta tagaya haenagalafa vava kana huta mainonage'ya “Hamaesage'ya falisae.” hu'ya hage'ya vea'mo'yaene ensole vava'ene tagaila nelage'ya kigi hunelatae. ¹⁰ Tagaya Yisasi Kalaisi ali'ya ne'alunanagita aifo vava kana huta mainonagi tamakaya Kalaisi'ene ailokaetama mainetama kanale havi havi'yatami hanea vea'ne mainao? Tagaya tokiyatia omale vava maunagetama tamakaya tokiyatami hanea vea'ne mainao? Tamakai tamakia alisaga nehayanagi tagaifena “Otahaiya vava mainae.” hu'ya nehae. ¹¹ Yisasi kema hamanepeunafe nayo'ene meni kanafi'ene neyafena lagala neleno tifena nelageno nehie. Kenatia haviya nehuno faesuna no'enena omalegeta vaiyatete nehunage'ya ka'yo kevea nelamiye. ¹² Kaveti ali falote hisuna yafena tayapitila tusi'a ali'ya ne'alune. Vava'mo'ya tagaila hu-haviya hu nelatayanagi anona'a kanale manua ne'amamune. Tagaila tusiya hu'ya ali haviyana hulatayanagi tagaya tokiya vaita mainone. ¹³ Hu-

haviya hu nelatayanagi anona^lamia ako huta falu hamaisifa ke hune^lamatone. Nayo^lene meniene vaya^lmo^lya tagaifena “Kasali-mainea yama halafi hutalaya avamete vaya mainae.” hu^lya nehæ.

Polo'a “Nagai au^lava akave male ho.” huno hamapai-mainæ.

¹⁴ Mani kea havitama tamakaye hisie hu^lna nokaogi nagaila nahaiya nafa^lneyagamo-gatama ali lamakafa hisue hu^lna mani kea kae-maleno^e.
¹⁵ Kalaisima akave visaya kea teni tauseni^la (10,000) vaya hulamave-lisayana nagaya nagai^lnige nagoke nelamafa^lna maino^e. Yisasi Kalaisi kanale mono kema tamahapaugetama havitama Anumaya Kotina tamaku^la amitafa hageno agai^la nafa^lneyaga lamateneafe nagaya nelamafa^lna maino^e.
¹⁶ Mainoa yafe nagayama nemauva au^lava kavala agetetama akave maletama maiho.
¹⁷ Ani yafe Timotina hutogeno tamakaite umaine. Timoti^la Anumayatimo^lene ailokaeno maineno kanale ali^lya ne^lalianagino nagaila nahau nayamopafi nenahaiya nafa^lne^lni^la maineafe nagayama Yisasi Kalaisi^lene ailokae^lna maine^lna vai ne^layoa au^lava yafena tamahapaiteno ani kate visaya kea huno tamakesa hugahie. Muki^la kumate uvana Yisasife havi^lya amakupi malenaya vea^lmogamina mani kea hamanepauvane.

¹⁸ Nago^lamogatama nagai^lfena “Omegahie.” hutama nehutama tamakaitami tamaugafa ali-

tama nehaiye. ¹⁹ Nehaiyanagi Anumayamo¹a hainegenoma “Vuo.” huno hunatesige¹na iva aupala ago egahue. Ne¹e¹na amakai¹ami amaugafa ali¹ya nehaiya vayala mo ne¹amake¹na nagaifema nehaya kea havite¹na tokiya¹amiene agegahue. ²⁰ Anumaya Koti¹ma kava yagai-mainea yamo aepa¹a ke¹agela omalenegi Anumaya Kotina tokiya¹a alita maisuna yamo¹enena aepa¹a hane. ²¹ Tamakaila na kava hisuafe nelamahaiye? Kelama-kisua kema hisua yafe esuo? Ifi ako hu¹na tamakaifena aluya huno nahau nayamopafi nenahaiya kava hugahe esuo? Ani yafena lamakesa nehavitama etetama ftago hutama maisayana tamakaifena nahau nayamopafi nahau-mainenage¹na eva¹yi hano.

5

Kumai he yamo¹a Kolini veapina hane.

¹ Nago kema falote hige¹na havuana Yisasi kema nohaviya vea¹mo¹ya nohaya kefo yana tamakai veapitila nago vea¹mo¹ya maitama nehae. Nago kanomo¹a nefa a¹ene kumai heno alitea tamavagea hage¹na havi-mainoe. ² Havuanagi na¹a higetama tamaugafa alitama nehaiye? Na¹a higetama tamahauna hutama tamakayea nohigetama tamakaipitila ani kanoa anati no¹atalae. ³ Nagaya alule mainoanagi afa¹a nagu namemo¹a tamakai¹ene mainege¹na ani kefo yama humainea kanomofena “Kefo ya nehie.” hu¹na Yisasi Kalaisi agile nehue. ⁴ Anumayatimo¹a Yisasi agile alitalu hutama

mainageno nagaila nagu namemo'ene Yisasi Kalaisi tokiyamo'ene tamakai'ena maigahie. ⁵Maigahigi Anumayatimo'a kaiyekema hulatesia kanafina ani kanomo agu amena aligatisiafene hutama menia Satani ayapi ateho. Satani'a augafa'age haesigeno age ha'yema nehia yama'a ha'no hisigeno “Kefo ya nehue.” huno agu'a aiyahae huno eteno eno.

“Kolini vaya'mo'ya kefo yama hisia kanoa anati-taleho.” huno humane.

⁶ Tamakaya tamaugafama alitama nehaiya yana kanale ohunea kava nehae. Tamakaya ma yafena ohavinao? Ta'nefaleti kai hame maya talo hageno osi kano'amo halegisia yana maleteno alino havigu hinageno muki'a ta'nefafi ute ete hinageno haenaga muki'a ta'nefamo'a halenegie. Anima hale negia avamete huno osi kefo ya kano'amo'agi muki'a veapinaga ute ete hisigeno ala kefo yana ali falote hugahie. ⁷ Hugahigi kaihamema hale negia atafa yana kai hamepitila alitama haga'yu hu ne'atalaya avamete fatago kavake'ya huta maisunafene hutama tamakaipitila kefo yana alitama haga'yu hutaleho. Nayona vea'mo'ya kefo ya'amihe havi'ya sipi sipi hemainaya avamete huno Yisasi'a tagayama fatago huta maisuna yafe fali-mainegegeta kefo yana ohisuna veala maisune. ⁸ Ani yafe nayona vea'mo'ya sipi sipia he'ya muse humainaya avamete huta musena nehuta hale negia yana, vea ali haviya humatesuna kava'ene kefo ya'ene

ne'ataleta fatago huta tole lagesa ohavita kelam-
age kege'ya huta maisune.

⁹ Nago'ma kae-malenoa avopina mage hu'na
humainoe “Kumai nehesaya vea'nenena
tokaetama omaiho.” hu'na kae-maleno.
¹⁰ Yisasi kema nohaviya vea'mo'ya kumai
nehaya vea'nene amakai'ami'aheke'ya amakesa
havi'ya “Nagai'ni'a muki'a yana alisue.” hu'ya
nehaya vea'nene havige hu'ya musufayama
nehaya vea'nene ago fali-mainaya veafe
“Anumayati mainae.” hu'ya amakisana ne'vaiya
vea'nene muki'a mopale mainayafe ani vea'nene
tokaetama omaiho hu'na hisugetama hanate
haote yatela maisae? Yisasi kema nohaviya
veafena mani kea ohunoe. ¹¹ Ohunogi nagaya
Yisasina amaku'a amitafa humainaya tamafu-
tamakana'ya kumai he kava'ene agai'ahe
agesa havino “Muki'a yana nagai ya hapaesie.”
huno nehisia kava'ene ago fali-mainaya veafe
“Anumayati mainae.” hu'ya amakisana ne'vaiya
kava'ene vaya'amihe hu-haviya humate
kava'ene havili ne'ya aneginagi nehaya kava'ene
musufayama nehaya kava'enema tamafu-
tamakana'yama hisagetama amakai'enena
ailokaetama maitama kavela oneho hu'na
hulokiya vai'na avona kae-maleno.

¹²⁻¹³ Anumayamo akave nomalaya veala fako
humatesia yana nagai ali'yana omalegi Anumaya
Koti'a agai'a ali'yanagino kaiyekea humate-
gahie. Tagai'ene maine'ya Yisasina amaku'a
amitafa humainesaya veala kanale'ya hutama

fako hutama “Kefo yana ohiho.” hutama amaya hisaya ali'yatamia hanegeno Anumaya Koti avopina mage huno kae-maleneane
 “Tamakai'ene maineno kefo yama nehisia kanomona henati-taleho.” huno kae-maleneane.

6

Yisasi anaga'mo'ya ne'amafugamina kaiyekea hu o'matesae.

¹ Nago'a nelamafu'yaene kema vaitetama agai'ma kaiyekema hutegahena na'a higetama Anumayamo kema akave nomalaya kava vayatela amavaletama ne'vae? Ani kavala ohiho. Yisasina amaku'a amitafa humainesaya vayate vigeno ketamia alino kanale huno fatago hulamateno. ² Yisasi anaga'mo'ya haenaga'a ma mopale vea'mogamina kaiyekea humategahae hu'ya humainaya kea ohavinao? Muki'a veala kaiyekea humategahagi osi kea fako hisaya tokiyatamia hane hu'na nehue? ³ Tamakaya ohavinao? Haenaga'a tagaya ensole vaya'mogami kaiyekea humategahunagi ma mopale yana osi yanagitama tamakaya afa'a fako hugahae. ⁴ Nago yama falote hisia yupa kema fako hugahena na'a higetama Anumayamo akave nomale'ya mono nopi amaki omale vayatela kea alitama ne'vae? Ani kava'ma hayana havi kava nehae. ⁵ Tamakaipina tole nelamafugania kema vaisa'ageno'a tamakaipina nagola kanale havi havi'ya'a hanea kanoa amu'no'anifi hetino ke'anima fako hisia kanoa

omaineo? Mainegahie. Tamakaye hisifa kea nehue. ⁶ Na'a higetama ani kanomotela anavaletama o'utama nelamafuganina kaiyekema hunategahena Anumayamo akave nomalaya kanomotela anavaletama ne'vae?

⁷ Ke vai yatamima falote higetama kaiyekema humategahe vayana havi kava nehae. Nago kanomo'a kagaila havi kava'ma hunegatesiana "Afa yane." nehuka kaiyekea hu o'ateka yuna heka maite'asina kanale hile'asine. Nago kanomo'a kagaipiti musufayama higeka "Afa yane." nehuka kaiyekea hu o'ateka maite'asina kanale hile'asine. ⁸ Kanale'ya hugahe hianagi ani kavala ohutama tamakaya havige hutama nelamafugamina havi kava hune'amatae. ⁹ Kefo yama nehaya veala Anumaya Koti'a kava yagai-mainea kumatela ohaigahae huno humainea kea ohavinao? Ani kehena havilama hutetama havige hisaya kea ohaviho. Ani kefo yama nehaya veala Anumaya Koti'a kava yagai-mainea kumatela ohaigahae moli hulite'ya nehu'ya kumai nehaya vea'nene ago fali-mainaya vayafe "Anumayati maine." hu'ya amakisana ne'vaiya vea'nene alu kanomo a'nema amavayu nehaya vaya'ene ve amafalu'yaene moli nehaya vaya'ene Anumaya Koti'ma kava yagai-mainea kumatela o'ugahae. ¹⁰ Musufa yama nehaya vea'nene alu kanomo yate'ma age hama'ye nehaya vea'nene havili ne'ya aneginagi nehaya vea'nene nago'a veafe hu-haviya nehaya vea'nene havige hu'ya musufa yama nehaya

vea'nene Anumaya Koti'ma kava yagai-mainea kumatela amaugosa tamage huno omalegahie. ¹¹ Tamakaila nago'atamimo'ya nayona ani avamete kefo ya nehageno Anumayatimo'a Yisasi Kalaisi agileti'ene Anumaya Koti Avamuteti'ene kefo yatamia ago aye ha'mi-talegetama alu aotage vea'ne maigeno Anumaya Koti aafina “Fatago vea'ne mainae.” huno alino kanale hulamatene.

Muki'a laugafa Anumaya Kotina noma'ae.

¹² “Muki'a yama hisuna kavala kahe-okineanagita afa'a hugahune.” hu'ya nehayanagi nagaya mage hu'na nehue “Muki'a yamo'a laya ohutafa huno laya ohugahie. Muki'a yana afa'a hugahuanagi ani yamo'a nofi hunate yafenagi'na nagaya ani kavala ohugahue.” ¹³ “Anumaya Koti'a kave nesunafene huno taipa talo huno nesuna kavala talo humaleneanagita afa'a negahune.” hu'ya nehayanagi Anumaya Koti'a haenaga'a kave'ene taipaene alino fanane hugahie. Moli huliteta huta kumai hesunafene huno Anumaya Koti'a vea'mogati laugafa talo ohunegi Anumayamo'ene ailokaeta mainesunageno ani laugafa agai'a kava yagaisiafene huno talo hulatenea yafe moli huliteta huta kumai he kavala ohisune. ¹⁴ Anumaya Koti'a tokiya'aleti Yisasina falimainefitila alino hetiteneanagino tagayama falisunageno'a ani'a huno alino hetilategahie.

¹⁵ Nagi ohavinao Kalaisi'enema mai hapaita mainonageno tagai taugafamo'a Kalaisi aiya,

aya, aulaga, agesa, kana huta mainone. Kalaisi augafa mainonagi hana'a huta Kalaisi augafa kumai nehaya a'nenena alita mai hapaisune? A'ao ani'a ohisune. ¹⁶ Anumaya Koti avopina mage huno kae-maleneane

“Alavema maina'ana nagoke anaugafa hane.”
huno kae-maleneane.

Na'a humaineanagi nago kanomo'a kumai nehea a'ene noma faeyana agai'ene mai hapai'ageno nagoke anaugafa kali-maina'e. Ani yafena ohavinao? ¹⁷ Nago anaugafa kali maina'anagi Anumayamo'ene mai hapaino mainea kanomo'a nagopi maine'ana nagoke anamete maina'e.

¹⁸ Nagi kumai heyafena kolia hutama ohutafa hiho. Muki'a kefo yamo'a amega amaugafale yanagi kumai he yamo'a alino vea amaugafafina haviya nehia yafena tusi'a koli hutama ani kavala ohutafa hiho. ¹⁹ Anumaya Koti'a agai'a Alu Aotage Avamu'a ago tamamigeno tamakupina maineafe tamaugafamo'a

Avamu'mona noma'a haneanagino tamaugafa tamakaitami yana omalene. Ani kea ohavinao? ²⁰ Anumaya Koti'a ala miyateti tamakaila ago miya hulamateneafe tamaugafa kava yagaitama kanale au'ava yake'ya hutama Anumaya Koti

agia alisaga hiho.

7

Polo'a alavemogami au'avafe humaine.

¹ Avoma kaetama nahavigaya kea tamahapaigahugi haviho. Nago kanomo'a

a'nea ali o'atesiana kanale'ya huno maigahie. ² Maigahianagi amaugafa age hama'ye hu'ya kumai he yamo'a ala nehiafe muki'a vemo'ya a'ne'amia maitetele hisige'ya a'nemo'ya ve'amia maitetele hisie. ³ Alavemo'ya nehaya yana vemo'a a'amona "A'ao." hu o'ateno a'mo'a ani'a huno anau'amona "A'ao." hu o'atesie. ⁴ A'mo augafa agai'a augafa omalenegi anau'amo yagai-mainea augafa hane. Ani'a huno vemo augafa agai'a augafa omalenegi a'amo yagai-mainea augafa hane. ⁵ Na'a humaineafe vemoga akamo'ene humo kavafena "A'ao." hu o'ategeno a'moga anaukamo'ene humo kavafena "A'ao." hu o'ato. Nagote tokaetana mainetana tanakesa havitana "Osi kana kano'a humo kavala ohuta'a afa'a maineta'a nunamuna hugahu'e." hutana hisa'ana kanale hugahianagi muki'a kanafina ve alave humo kavala o'ataleho. Atalesa'ana Satani'a ayelana-vataga hinagetana alu vele'ene alu ate'ene age lanaha'ye hu yafenagi osi'a maigetana hi'o.

⁶ Mage hu'na nehua kea nagai'ni'a mani kea nehugi Anumaya Koti kahegi kea nohue. ⁷ Nagi nagai'nige maine'na a'ma o'alinoa yama hu'ya muki'a vayala maisaya yafe nenahaiyanagi Anumaya Koti'a agai'a alu'a lu'a mai yana nagoke nagoke'mogatina tamigeta tahaote tahaote au'avate nemaune.

⁸ Neya'vene muna'nene keto a'neneke mani kea nehue nagayama a'ma o'ali'na mainoa avamete hu'ya maisayana kanale'ya hugahie. ⁹ Hugahigi age hama'yema hisaya yatela ya-

gaisaya tokiya'amima omalesiana ata lamale-yafenagi a'nea alitesage'ya vea alisage'ya hisae.

¹⁰ Alavemogatama kahegi kea, nagai'nia nagesafitila nohugi Anumayamo humainea kea tamahapaigahue. A'nemogatama vetamia o'amataletama kanale'ya hutama maiho.

¹¹ Maigahayanagi vetamima amataletama vinutamahena alu velela omaiho. Afa'la omaisaya tamakesa hisigetama etetama vetamile etama nagoke tamaipale emaiho. Vemogatama atamimona tamakaitamia hu o'amateho.

¹² Nago'amogatamihena Anumayamo'a ohunea kea nagai'ni'a mage nehue. Yisasite ametiti humainesia kanomo'a Anumayamote ametiti nohisia a'mo'a neve'lenema maisia agesama havisigeno'a neve'a "Nenataleka vuo." huno o'ataleno. ¹³ Yisasite ametiti humainesia a'mo'a Anumayamote ametiti nohisia vele'ma mainesigeno ani vemo'a a'amo'ene maisia agesama havisigeno'a "Nenataleka vuo." huno nevena hu o'ateno.

¹⁴ Nagi Yisasite ametiti hu-mainesia a'mo'a Yisasite ametiti nohisia neve'lenema maisiana ailokae'ana maisa'a yamo'a oni'ya'agela ohunegi ani vemo'a Anumaya Koti kema havisia yafe alu aotage kano maine. Yisasite ametiti hu-mainesia vemo'ma Yisasite ametiti nohisia a'lenema maisiana ailokae'ana maisa'a yamo'a oni'ya'agela ohunegi ani a'mo'a Anumaya Koti kema havisia yafe alu aotage a'ne maine. Anumaya Koti aufima alu aotage veatalama omaisa'ana nafa'ne'amimo'ya ani'a hu'ya oni'ya'agela hale'asinagi tamage hu'ya Anumaya Koti kema

havisaya yafe alu aotage nafa¹neyaga maigahae.
¹⁵ Mainageno Yisasite ametiti nohia api vefi atalesayana afa¹a atalegahae. Atalesayana Yisasite ametiti hunesia vea¹nefi maina¹a nofila ago aigalu hetalege¹ya afa¹a mainae. Anumaya Koti¹a falu huta huta maisunafe ke higeta agaitega emainone. ¹⁶ Yisasite kametiti hu-mainana a¹moga agai¹ene maineka aya hisanageno anaukamo¹a agu¹a aiyahae hinageno Anumaya Koti¹a agu amena aligatisio? huka kagaya ohavinane. Yisasite kametiti hu-mainana kanomoga akamo¹ene maineka aya hisanageno akamo¹a agu¹a aiyahae hinageno Anumaya Koti¹a agu amena aligatisio? huka kagaya ohavinane.

Anumaya Koti¹ma hulatenea au¹ava¹mo avamete maisune.

¹⁷ Anumaya Koti¹a muki¹a veala noma maisaya yana fako huno amamineanagitama muki¹amogatama Anumayamo¹a hapalimatenea yapi maiho. Mani kea Anumayamo anagala alule alule mo hamapai-mainogi haviho.
¹⁸ Anumayamo¹ma hapalimatenea kanafina nago¹a Yuta vaya¹mo¹ya amaugafa taga humalenaya amafugula hanege¹ya ete¹ya ani amafugula aye hanane¹ya fala okisae. Nago¹a vayamo¹ya Anumaya Koti¹a hapali-matenea kanaleti amaugafa taga ohunaya vaya¹mo¹ya menia laga ohisae. ¹⁹ Taugafa laga nehaya yano taga ohunaya yano ani tole yamo¹a afa ya hanegi Anumaya Koti kema havita akave malesuna yana kanale yanagino aepa¹a

hane. ²⁰ Nagi muki'amogatama Anumaya Koti'a ago'ma hapali-lamatenea kanafina no maiyatamia o'ataletama nago'ene anile maiho. ²¹ Anumayamo'a hapali-lamatenea yupa nofipi mainetama miya o'alisaya ali'ya* ne'alitama mainageno ani ali'yana afa'a aliho. Aligahagi kava kanotamimo'a “Menia nofila huotamategahugi afa'a lamatalegahue.” huno hisigetama muse nehutama afa'a ugahae. ²² Anumayamo'a hapali-lamatenea yupa nofipi mainetama miya o'alisaya ali'ya* ne'alitama Anumayatimo'ene ailokaetama mainayafe Anumayamo'a kefo yatamimo'ma alino nofi hulamatenefitila ago alino kalu he-taleneafe nofipina nago'ene omainae. Omainagi nago'a veala afa'a mainageno Anumayamo'a hapali-lamateneafe Kalaisi'a miyana o'alisia ali'ya vea'ne'a* tamage hutama maigahae. ²³ Anumaya Koti'a ala miyateti miya hu-lamategetama agai vea'ne mainagi ma mopafi vea'mogami ali'ya vea'nea omaisae hu'na nehue. ²⁴ Nafu'nagana-gatama Anumayamo'ma hapali-lamatenea kanafina no maiyatamia o'ataletama nago'ene Anumaya Koti'a tamakai'ene mainesigetama “Hai mainone.” hutama maiho.

Afa'a maine'ya vele'ma omai'ya a'ma o'alinaya vea'mogamife Polo'a humane.

²⁵ Anumaya Koti'a kalagi ainatege'na tamagege'ya hisua kanogi'na nago kea hugahe hue. Anumayamo'a mani kahegi kea ohunegi nagaya nagesafiti nehue. Vene ofaenesaya

muna'nene a'nene ofaenesaya veyagahe nehue. ²⁶ Meni kanafina tusi'a kana yana falote nehiafe nagesa mage hu'na nehavue neya'vene muna'neyagaene mainaya avamete hutama maiho. ²⁷ Nagi a'ma ago alitenesana vemoga akamofena “Kataloe.” huka hu o'ato. A'ma o'alinesana vemoga a'nea o'allo hu'na nehue. ²⁸ Nehuanagi a'ma ali-tenukahena kefo yana omaleneanagika afa'a aligane. Vene ofaenesaya muna'nemo'ya vele maisayana kefo yana omalenege ma mopafi mainesa'ageno tanakaipina kasago'ya kana yamo falote huyafenagi'na mani kea nehue.

²⁹ Nafu'nagana-gatama ma mopamo'a aupa kanafi ha'no hisia yafe meni kanaleti aepa hetama a'ma atenesia kanomo'a a'amofena agha ohavino a'ama omai kano kana huno maisie hu'na nehue. ³⁰ Nago'amo'ya avima ne'atesaya vea'mo'ya osi kano'a avia ateho. Musema nehisaya vea'mo'ya osi kano'a musena hiho. Afeno'amima miya nehisaya vea'mo'ya o'ali vea kana hu'ya maiho. ³¹ Mama mainona mopa aupa kanafi fanane hugahigi mopafi ali'yama ne'alisaya vea'mo'ya mani mopale yafeke'yana amakesa havi havi hu'ya omaisae. ³² Ma mopale yafema tamakesa ku'mo'ma haya yafena nagaila nonahaiye.

A'ma o'alino mainea kanomo'a Anumayamona haisia yafe'ene ali'yama'aene agha havi havi huno nemaiye. ³³ Nemaiyanagi a'ama mainea kanomo'a ma mopafi yafena,

a'amo'a musema hisiafene agesa havi havi huno nemaiye. ³⁴ Nago kaiyaga Anumayamofena agesa nehavino nago agesamo'a a'amofena agesa nehavianagi keto a'nene vele o'unaya muna'nene Anumayamo ali'yafeke'ya amakesa havi'ya “Muki'a taugafaene tagu'aene Anumayamona alu aotage noma'a hane.” hu'ya kava yagai'ya mainayanagi vele mainaya a'nemo'ya anau'amimo'ya musema humatesayafene hu'ya mopafi yafe amakesa nehaviye.

³⁵ Mani kemo'a katilelamatesua kea nohugi tamaya hisuafe nehue. Kanale'ya hutama Anumayamofena tamakesa havi havi hutama nago yamo tamavayu huno atifi mafi ohisie hu'na nehue.

³⁶ Nago kanomo'a hage-malenesia a'amofena hagoteno “Afa'a tokaeta'a omaigahu'e.” huno huteno haenaga'a tusi ha'ye hisigeno “Kanale kavala hu no'latoe.” huno haisia kava huno ani munala alitesie. Alitesiana kefo yana ohugahie.

³⁷ Nago neyamo'a agu'a amino hage-malenea a'amofena “Anumayamo ali'ya alisu'afe afa'a aote maigahu'e.” huno agesa haviteno augafa age ha'ye hisia agu agesa hinageno kanale'ya huno kava yagaino “Afa'a aote maigahu'e.” hisiana kanale kava hugahie. ³⁸ Ani yafe nago kanomo'a hage-malenesia a'ama alitesiana kanale kava nehianagi nago kanomo'a hage-malenesia a'ama ali o'atesiana tusi'a kanale kava hugahie.

39 A'neyaga vele'ma faitesageno anau'amo'ma ofalino afa'a mainesigeno'a nagopi mai hapaino maineno a'mo'a ataleno alu vele o'visie. Anau'amo'ma falitesigeno'ma “Alu kanole maigahue.” huno hisiana kanale hugahianagi Anumayamo'ene mai-lokaeno mainesia vea alisie. 40 Aligahianagi nagaya nagesa havuana afa'ama maisiana tusi'a muse hugahie hu'na nehue. Manima hua kea Anumayamo Avamu'mo nahapaige'na nehue.

8

Afa yafe “Anumayati maine.” hu'ya amametiti nehaya yafe humaine.

1 Ago fali-mainaya vayafe “Anumayati maine.” hu'ya amakisana vai'ya afu ne'amamiya yamo kea nagaya hugahe nehue. Tagaya nago'a yafena havilinonanagi ani kanale havi'yatimo'a tamaugafa alita haisuna yanagi alu veafe tahau-tamayamopafi nelahaiya yana amaya huta ali tokiya vaimategahune. 2 “Muki'a yana havilama hulinoe.” huno agesa havisia kanomo'a muki'a yafema havilama hisia himamu'a omaleneanagino ohavine. 3 Ohavinegi nago'a vea'mo'ya Anumaya Kotina amaku'a aminesaya veala Anumaya Koti'a amakaila ago amakelama humaine.

4 Ago fali-mainaya veafe “Anumayati maine.” hu'ya amakisana vai'yama ne'amiya afuma nesaya yafe nehugi haviho. Tagaya havunana ago fali-mainaya vea'mo'ya ma mopafina

tokiya'amia omalene. Anumaya Koti'a agai'age nagoke Anumaya maineanagi'ya kasago'ya Anumaya omainae. ⁵⁻⁶ Omainagi mopale'ene ikapinagaene afa anumaya kasago'yama mainale'asina tagaya tamage hute'asinagi “Nelafa'a agai'age Anumaya Koti'a maineno muki'a yana talo humalegeta mainone. Nagoke Anumayatimo'a Yisasi Kalaisi'a maineno muki'a yana talo huteno tagai'enena talo hulateneanagita agaiteti tahaimula ne'alune.”

⁷ Nago'a vea'mo'ya mani kea ohavine'ya “Afa anumayayaga tamage hu'ya mainae.” hu'ya nehae. Nago'a vea'mo'ya Yisasife havi'ya amakupi malayanagi amaku'amo'a tokiya'agela ohuneafe ani afa anumayamoma aminaya afua nene'ya mage nehae “Afa anumayamo kave nenonageno ani kave'mo'a tagu'amona alino haviya higeno oni'ya'age nehie.” hu'ya amakesa havimainae. ⁸ Nehaviyanagi kave'mo'a Anumaya Koti avatela tavaleno oategahie. Ani afuma onesunana Anumaya Koti aufina havi veala omaigahunagi nesunana Anumaya Koti aufina kanale vea'nea omaigahune.

⁹ “Afa'a anumayamogami amamiya afua negahune.” hutama hisaya yafena ka'yeho. Havigu Yisasifena amaku'amo'a tokiya o'vainesia vea'mo'ya agete'ya nesayana “Kefo ya nehune.” hu'ya havigu asaga hulaviyafenagi ka'yeho. ¹⁰ “Afa'a anumayayaga tamage hu'ya omainae.” hutama havimainaya vea'mogatama anima afa anumayamo amiya

afuma malenesaya nopi mo nenesageno nagola Yisasifena agu'amo'a tokiya o'vainesia kanomo'a tamaketeno “Negahue.” huno hu yafenagi ka'ye ho. ¹¹ Ani yafe tamakaya “Havilama humainone.” hutama nehaya yatamimo'a, nago'ma agu'amo'a tokiya o'vainea nelamafufe huno Kalaisi'a fali-maineanagitama tamakaya avaletama havi kate atesageno ali haviya huyafenagi ka'ye ho. ¹² Ani yafe agu'amo'a tokiya o'vainesia nelamafuna kefo ya hutesageno tokiya'a omalesia agu nafa'nea agata aisia havi kava huteyafenagi ka'ye ho. Tamafu-tamakanana kefo ya'ma hutesayana Kalaisi'ene kefo yana hune'atae. ¹³ Ani yafe kavela nenoanagi'na nafu'naganana havigu neteno havi kapi asaga hulavino visia yafenagi'na nagai'enena nago'ene afua onegahue. Havigu nafu'nagana'a kefo yapi uyafenagi'na ani kavala ohugahue.

9

Polo'a Yisasi ali'yama aliana miyama o'alinea yafena muse humaine.

¹ Nago kanomo'a “Na'a ohuo.” huno natafa nehio? A'ao natafa nohie. Aposolo kanoa maino? E, ani kano mainoe. Nagaya Anu-mayatimo Yisasina agemaino? E, tamage Anu-mayamo'ene ailokae'na maine'na agai ali'ya ali-mainoa ali'yateti lamakaya tamaku'a aiyahae nehae. ² Nago'a vea'mo'ya nagai'fena mage

nehae “Aposolo kanoa omaine.” hu'ya nehayanagi Yisasi kema tamahapaugetama havi-tama tamaku'a aiyahae hage'ya vea'mo'ya nelamake'ya nagaifena “Anumayamo'ene ailokaeno Aposolo kanoa maine.” hu'ya nehae.

³ Nago'a vea'mo'ya au'ava'ni'ama fako hisage'na nagaya mage hu'na hugahue. ⁴ “Anumayamo ali'yana ne'aluanagi'na kave'ene ti'enena afa'a alisuo? ⁵ Nago'a Aposolo vaya'ene Yisasi agana'amo'yaene Pita'ene nehaya kava hu'na Yisasima agu'a aminesia a'ma alitene'na avale'na vaiyesuana ani yamo'a havi kava hugahio? ⁶ Panapasi'ene ta'agaiti'age Anumayamo ali'yana ne'alita'a ta'agaiti'a moneleti kavela miya huta'a neno'e. Na'a higetama ta'aya nohae? ⁷ Nagi ati vayala kamele ugahena amakai'ami mone'amileti kave'amia kena'amia miya nehao? A'ao. Hana kanomo hoya vai-maleteno ani hoyafitila kavela alino onene? Hana kanomo pulumaka kava yagaiteno haenaga'a nutima'a onene? Ani kavala ohugahagi afa'a ali'ya negahae.”

⁸ Vea'mo'ya nehaya kavake'ya akave male'na mani kea nehoo? A'ao, Anumaya Koti avopi'ene ani kea huno kae-maleneane. ⁹ Mosese kahegi kefina mage huno kae-maleneane

“Pulumakamo'a ali'yama'a ne'alino vitimo avina ayeno hagage huno onesie hutama avayalela nofila okinegeno ali'yana ne'alino kavela neno.” huno kae-maleneane.

Mani kea Anumaya Koti'a pulumakamofe humaineo? ¹⁰ A'ao, tagaife humaine. Nagi hoyama alino humalenea kanomo'a kave nesia yafena agesa haviteno negafie. Hoyafiti'ma nena humainesia kave'ma ne'alisia kanomo'enena “Ali'yati'aleti kavela nagopi maineta'a negahu'e.” hu'ana ali'yana ne'ali'e. ¹¹ Nagaya Anumayamo kea huhale'na tamahapaitena Avamu'mo avina yana hoyafina kali-malenogi ani hoyamo'ma nena hisige'nahena tamakaipitila kena'niene kave'niene kanalelagi'na alisuo ifi o'alisue? ¹² Nago'a vaya'mo'ya tamakaipitila ne'aligi nagaya amakase-mainoa yafena tamakaipitila alisuo o'alisuana? Kanalelagi'na aligahuanagi havigu Yisasi Kalaisi kanale mono kema havisaya katamia kahea ki'otamatesuafene hu'na kavela o'ali'na maine'na muki'a kana yana aluanagi “Kavela namiho.” hu'na nohue.

¹³ Mono nopi ali'ya ne'aliya vaya'mo'ya ani nopiti kave'amia ne'aliye. Anumayamofe havi'ya sipi sipi he'ya kae-salamana nehaya ali'ya vaya'mo'ya ani sipi sipifiti kave'amia ali-mainae. Ani kea ohavinao? ¹⁴ Na'ama hayana Yisasi kanale mono kema hamanepaiya vayafena Anumayamo'a mage humaineane “Mono ketamima havisaya vea'mo'ya anona'a kenatamia kavetamia tamamisae.” huno humaineane.

¹⁵ Humaineanagi nagaya “Namiho.” hu'na ohunanangi menia “Namiho.” hu'na mani avona nokaove. Yisasi kema tamahapauvana

tamakaipitila kavela afa'a o'alinoa yafena muse nehua yani'a haneafe ago faligahema husina kavefena tamahavigesua nagesa ohavusine. ¹⁶ Yisasi kanale mono kema huhale'na nehuafenagi'na nagai'ni naugafa ali'na ohaigahue. Anumaya Koti'a "Na'a huo." huno tokiya'age ke huno hunatege'na huhale'na nehue. Ohule'asina Anumaya Koti'a muse ohigeno kana yana namile'asine. ¹⁷ Nagaya nagesafiti ani ali'yana no'alugi Anumayamo hunatege'na mani ali'yama alua yafena miya yani'a o'aligahue. ¹⁸ Anumayamo'a hunatege'na huhale'na nehua ali'yana afa'a ne'aluanagi'na monema onamisaya yafena naipamo'a kanale nehie. Huhale'na nehua yatetila miyani'a alisua amuko'nia haneanagi o'alisua yatetila muse yani'a hane.

Polo'a muki'a vea'mogami ali'ya kano maine.

¹⁹ Monema o'alua yafena nago'a vea'mogami ali'ya kano'amia omainogi muki'a vea'mo'ya amaku'a aiyahae hisayafene hu'na ali'ya kano'amia mainoe. ²⁰ Yuta vea'mo'ya Yisasi akave hisaya yafe amakai'ami nehaya kava hu'na maine'na Yisasi kea hamanepauve. Kahegi kema havi'na akave malesugeno'a Anumayamo'a "Fatago kano mainane." huno hunategahie hu'na nohugi ani kema akave nemalaya veala Yisasi akave hisae hu'na amakai'ene maine'na mani kemo akave male'na Yisasi kea hamanepauve. ²¹ Kahegi kema ohavinaya vea'nene maine'na Yisasi akave

hisae hu'na amakaya haya avamete hu'na Yisasi kea hamane'pauve. Anumaya Koti kahegi kea akave male'na Kalaisi akave nehu'na agai kea havi'na akave nemaloe. ²² Yisasife havi'ya tokiya vaisaya amaku'a omalenesia vea'nene maine'na amaku'a ali lokiya vaimatesuafe tokiya nagu hanea kano omainoe. Nago'a vea'mogami amaku amamena aligatisua yafe aluya hu'na amakai'amima amahaote amahaote nehaya kava hu'na Yisasi kea hamane'pauve. ²³ Na'a nehisuge'ya kasago'ya vea'mo'ya Yisasi hulatenea kanale mono kea havitesage'na amakai'ene kanale'ya hu'na maine'na musena hisue hu'na nehue.

Tagaya taiyage taiyage huta uva'yi huo huno humainele uva'yi huta anona'a alisune.

²⁴ Ohavinao o'agase a'agase hu'ya amakasaya vea'mo'ya ne'aliya yana nagoke kanomo'a amakaseno agai'age muse yana aligahie. Ani kava hutama tamaiyage tamaiyage nehigeno Anumayamo'a anona'a tamamino. ²⁵ Ani yokaloma nelaya vea'mo'ya aluya hu'ya amaku amakesalela tokiya vai'ya kava ne'yagaiye. Muse hisaya yama anona'amia alisaya yafe kava yagai'ya mainageno amakasesia kanomo'a konagali yana aligahianagi ani yamo'a fanane hugahie. Fanane hugahianagi tagaya fanane ohisia kanale yana anonatia alisunafene huta tagu tagesalela tokiya vaita ne'yagaune. ²⁶ Ani yama alisua yafena naiyayege naiyayege nehu'na amakasesuafene hu'na faitega moge

mege nohue. Nayateti'ene amakasesua yokalooa nele'na nagaya faitega mo ai me ai nohugi nayatetila vava amaugafale sili hu'na amaikonelue. ²⁷ “Fatago kate viho.” hu'na vea'ma hamanepaisuletila havigu nagaya havi kate visugeno Anumaya Koti'a nagaila akave'no hunatesige'na kanale anona'nia o'alisuafene hu'na tusiya hu'na “Naugafamo age ha'ye hia yana ohugahue.” hu'na nagu nagesale kava yagai'na mainoe.

10

Havigu ayelavataga hisia yapi asaga hu lavisunagi ka'lyeta maisune.

¹⁻² Nafu'nagana-gatama Yuta taginagomogamifena tamakesa havisae hu'na nehue. Mosese akave'ma umainayana nago sia'mo'a muki'a aiso humateneno kana amavelige'ya kanale'ya hu'ya vayana muki'amo'ya Haesa tina lakae-mainayafe Mosese'ene ailokae'ya maine'ya siateti'ene hage liteti'ene tima fale neamataya avame kavala humaine. ³⁻⁴ Muki'amo'ya ti omale kotega umaine'ya nagoke ikapinagati kave'ene yafapiti falote hia alu aotage ti'ene ne-mainae. Ne-mainagi ani yafana Kalaisi'e. Agaya maineno amakai'ene vaiyatete humaine. ⁵ Muki'amo'ya nayanagi kasago'ya vea'mo'ya Anumaya Koti kea akave omalageno Anumaya Koti'a musena hu o'amateno amatalege'ya nago'a veala falige'ya

amaugafa ka'me kopi atalegeno mopagopi haneme umaine.

⁶ Na'lama humainaya kavala tagaiti hulamakesa hisunafe hu-mainayanagita amakaya humainaya avamete huta age laha'ye nehuna kavala ohisune. ⁷ Nago'a vea'mo'ya afa anumaya, amayateti talo humalete'ya amaku'a amite'ya Anumaya Koti kea atalenayane. Tagaya ani kavala ohisunafe Anumayamo avopina mage huno kae-maleneane

“Afa anumayamofena muse hu'ya kave'lene ti'ene nete'ya amoa aye'ya a'nene yokaloa lemmaine.” huno avopina kae-maleneane.

⁸ Nago'a vea'mo'ya kumai haya yateti nagoke yupa tueti tali tauseni'a (23,000) vea'ne fali ha'no humainae. Na'a humainayafe tagaya kumai kavala ohisune. ⁹ Anumayamofe “Ma kava huo.” hu'ya ayevataga hayafe osifa'vemo'ya hamae ha'no hage'ya fali-mainagi ani'a huta Anumayamona ayevataga ohisune. ¹⁰ Nago'a vea'mo'ya “Anumayamo'a havi kava nehie.” hu'ya kalu kalu ke hutageno ensole kanomo'a nago'a veala me hamaege'ya fali-mainayane. Tamakaya Anumayamofena kalu kalu kea vaio'ateho.

¹¹ Muki'a anima falote humainea yana ageteta fatago huta maisunafene huno Anumaya Koti'a avopina kae-maleneane. Tagaya menima mainona kanafina mopamo'a aup'a fanane hugahe nehiafe mani kea haviteta kefo yana ohisunafene huno kae-maleneane.

¹² Na'a humaineafe “Kanale'ya huta hetimainone.” hutama nehisaya vea'mogatama

havigu asaga hu laviyafenagi yagaitama maiho. ¹³ Yagaitama mainesageno kana yano “Havi yama hiho.” huno¹ma ayelamavataga hisia yano falote hisiana ani yana tamakaitamige ayelamavataga nohigi muki¹a veala ani¹a huno ayemavataga nehie. Na¹a nehianagi Anumaya Koti¹a huno tokiya vaino humalenea kele tole agha ohavinegi ani kele akave maleno tamaya hugahie. Ayelamavataga hisigetama “Tokiya¹nia omalene.” hutama hugahe hageno tokiya waitama maisayafe Anumaya Koti¹a tusiya huno tamaya huno “Haegafa katela male viho.” huno tamave-ligahie.

Anumaya Kotite¹ene Kefo Avamute¹ene tole-mogani anakia alisaka ohiho.

¹⁴ Nahau-mainea nafu¹nagana-gatama ago fali-mainaya vea¹mogamife “Anumayati maine.” hutama amakisana ne¹vaiya yana ohiho. Anumaya Kotifeke¹ya muse huteho. ¹⁵ Tamakaya tamaku tamakesaene vea¹ne mainagi tamahapaisua kea havitama ali fako hiho. ¹⁶ “Kalaisi¹a tagai kefo yafene huno fali-maine.” huta tagesa havi havi hisuna yafe nofi alagamo tina, Kalaisi kolanagita alita Anumayamotega muse hutama nonana Kalaisi kolana tokaeta nenone. “Kalaisi¹a augafa agata aimainea yamo kefo yatia ago alitalene.” huta maya alita aposita nenona yamo Kalaisi augafa tokaeta nenone. ¹⁷ Nagoke maya haneanagi muki¹a vea¹mogata nagoke mayafiti aposita

nenonafe tagaya nagoke vea'ne nagoke kanomo augafa kana huta mainone.

¹⁸ Tamakaya tamakesa haviho Yuta vea'moya Anumaya Kotitega sipi sipi he'ya kae-salamana hete'ya tokae'ya anifiti ali'ya nete'ya Anumayamo'ene nagopi ailokae'ya mainayane. ¹⁹ Manima hua kemo aepa'a haviho. Ago fali-mainaya veafe “Anumayati maine.” hu'ya afu he'ya amakisana vai'ya amamiya yamo'a afa kava humainae. Anima fali-mainaya vea'mogamina tokiya'amia omalene. ²⁰ Tokiya'amia omalenegi nagaya tamahanepauve Yisasi kema nohaviya vea'mo'ya Kefo Avamu'mo kavela malenagi Anumaya Koti kavela omalenayane. Kefo Avamu'ene ailokaetama omaisae hu'na nehue. Ani kavela oneho. ²¹ Havigu tamakaya “Kalaisi'a tagai kefo yafe huno fali-maine.” hutama Anumayamo kapufiti nenetama Kefo Avamu'mogami ne'amamiya tina mo neyafenagi ani kavala tamage hutama ohiho. Havigu tamakaya Anumayamo kave nenetama Kefo Avamu'mogami amamiya kave'ene neyafenagi ani kavala ohiho. ²² “Ani kava nehisunageno Anumaya Koti aipamo'a haviya hisie hutama nehao? Ifi tagai tokiyamo'a agai tokiya agase-maine.” hutama nehao? A'ao, na'a kavala ohune.

Muki'a kanafina Anumaya Koti agi alisaga hisune.

²³ Nago'a vea'mo'ya mage hu'ya nehae “Muki'a hisuna kavala kahe okineanagita afa'a

hugahune.” hu'ya nehayanagi ani muki'a yamo'a taya ohugahie hu'na nehue. Muki'a kavala kahe okineanagita afa'a hugahunanagi muki'a ani yamo'a Yisasife havita tametiti humainona yamona alilokiya vai o'ategahie. ²⁴ Tagaiti laugafa ha'maesia yafekela tagesa ohavisune. A'ao, alu vea'mogami yafe tagesa havita amaya hisune.

²⁵ Maketifiti afumo ame'a miya hugahema vinutamahena “Kefo Avamu'ma amaminaya afuo? Nesunana haviya hulatesio?” hutama tamaku'afinaga haviio-ketama afa'a miya hutama neho. ²⁶ Anumayamo avopina mage huno kae-maleneane
 “Ma mopaene muki'a mopafi hanea ya'enena Anumayamo yama'age hane.” huno humaneane.

²⁷ Yisasi kema nohavisaya vea'mo'ya “Etama kavela me neho.” hu'ya hisagetama vinutamahena tamakesa ohavitama tamamisaya kavela afa'a neho. Havigu tamaku'amo'a “Havi kava nehae.” huno hisagetama havioketama afa'a neho. ²⁸⁻²⁹ Negahayanagi nago kanomo'a “Ma kavela Kefo Avamu'mo kae-salamana hutaya kavele.” huno hisigetamahena afa'a onetama ataleho. Tamakai tamaku'amo'a “Havi ya nehae.” huno hisia yafe'ene kahanepaiya kanomo agu'a ali haviya huyafenagi ani kavela oneho.

Ani kave nesuana nago kanomo agu'a ali haviya hu-yafenagi'na nagaya ani kavela nesuo ifi onesue? ³⁰ Nagaya ani kavela Anu-

mayamotega muse hute'na nesuana na'la hinageno nago kanomo'la nagaya anima muse hute'na noa yafena “Havi kavala nehane.” huno kea nenamake?

³¹ Kave nesao ali'ya alisao muki'la yama hinutamahena Anumayamo agia alisaga hisaya yafeke hiho. ³² Yuta vealo, Yuta vea omainaya vealo, Yisasife havi'ya amakupi malenaya vealo, muki'la vea'mogami amaufina kanale kavake'ya hiho. Havigu havi kava hisageno ani kefo yamo'la amaiyafi ako'ya yamo ayea kava hinage'ya asaga hu-lavisagi. ³³ Nagaya muki'la kava'ma nehuana nagai nahaisia yafe nagesa ohavi'na muki'la Anumaya Koti'la vea'mogamina amaku amamena aligatisiafene hu'na hamaisifa kava nehue.

11

¹ Nagaya Polo'nae Kalaisi'ma humainea kava hu'na akave nehugi nagaila nenagetama nagayama nehua kavake'ya nakave hutama maiho.

Mono nopima a'nemo'ya amanute aiso hisaya yafe humaine.

² Kahegi male'na tamahapaugetama tamakela okanitama kanale kava hutama akave nemalayafe “Kanale kava nehae.” hu'na musena hu nelamatoe. ³ Ma ma hisua kea havilama hiho. Anumaya Koti'la Yisasina ala kano'la maiteno agenopa maigeno Yisasife havi'ya amakupi malenaya vea'mogamina ala kano'amia Yisasi'la maiteno amakenopa'amia maige'ya ani'la hu'ya vemo'ya a'ne'amimogamina ala kano'amia maite'ya amakenopa'amia mainae.

4 Nago'a vaya'mo'ya Anumaya Koti kema huhale'ya nehu'yao nunamuma nehu'yao amanutela aiso ohisae*. Aiso hisayana Yisasina, amakenopamona agaye hisifa kava hune'atae.

5 Hune'atagi nago'a a'nemo'ya Anumaya Koti kema huhale'ya nehu'yao nunamuma nehu'yao hinu'ya amanutela nago yatetila aiso ohisayana* amakenopamo'a, anau'amimona agaye hisifa kava hu'ya amayolagefa muki'a laga hu-talenaya a'nemo'ya* nehaya augafa kava nehae.

6 Nago'a a'nemo'ya amanute'ma aiso ohisayana afa'a amayolagefa muki'a laga hu-alesae*. Tagama hu'ya aupa hisaya yamo'a amakaye hisifa kava'ma hanesige'ya ne'atale'ya amanutela aiso hisae.

7 Vemo'ya Anumaya Kotina amema'a "Anumayamo agi alisaga hisae." huno vemogamina talo hu-maleneafe amanutela aiso ohisagi a'nemo'ya anau'amimogami amaki alisaga hisayafe amanutela aiso hisae.

8 Anumaya Koti'a a'nemogami amaugafaleti vene'nea talo ohunegi vemogami amaugafaleti a'nea talo humalene.

9 Anumaya Koti'a a'nehe "Ha'mao." huno vene'nea talo ohunegi vehe "Ha'maesia yane." huno a'nea talo hu-maleneane.

10 Talo hu-maleneane yafe'ene ensole vaya'mo'ya ne'agaya yafe'ene a'nemo'ya "Anautimo amaiya'afi nemaune." hu'ya amanutela aiso hulisa hu'na nehue.

11 Nehuanagi Anumayamo'ene ailokaetama maisayana a'mo'a haotela agai'agela omaisie. Vemo'a ani'a huno haotela omaisie. Agaila

aya nehisiana agaila aya nehisiana hutana maisa¹e. ¹² Hagoteno vefiti a¹nea ali falote hige¹ya mainayanagi menia a¹nemo¹ya vene¹nea ne¹amatayanagi Anumaya Kotipiti muki¹a yamo¹a falote hu-maineafe aepa¹a maine.

¹³ Tamakaya tamakaitami haya kavala fako hutama ageho. A¹nemo¹ya amanutela aiso ohune¹ya nunamuma hisayana kanale nehio?

¹⁴ Tamakaitami haya yamo¹a tamaveli-maine vemo¹ya amayolagefa ku¹ma hanesiana amakaye hisaya yana hane. ¹⁵ Haneanagi “A¹nemogami amayolagefa kula muse hisaya konagali ya¹ami hane.” hutama nehae. Anumaya Koti¹a amanute aiso hisaya yafe amayolagefa kula amamine.

¹⁶ Nago¹a vea¹mo¹ya ani yafema kema vaisayana ani kenona¹amihe mani kea nehue nagai¹ene muki¹a Yisasife havita tagupi malenona vea¹nene alu au¹ava kavala nohunagi nagoke kavake¹ya nehune hu¹na nehue.

Kolini vea¹mo¹ya Anumayamo kave¹ma negahena fatago au¹ava kavala nohae.

¹⁷ Menima tamahapaisua kea haviho tamakaya havi kava nehage¹na havi¹na musena hu notamatoe. Yisasi agima alisaga hugahe melitalu hutama maifina kanale kavala nohagi havi kava nehage¹na nagai¹nia onahaiye hu¹na nehue.

¹⁸ Nago¹a vea¹mo¹ya nahapaiyana tamakaya Yisasife havitama melitalu hutama maifina ke ne¹vaitama tolefi ali fako nehae hu¹ya hayana tamage hu¹ya nehao? E, tamage nehae hu¹na nagesa nehavue. ¹⁹ Tamakai¹ene mainaya

veapina nago¹a veala fatago hu¹ya Anumaya Kotina haiya kavala nehae. Ani veala agetama falote hisaya yafe tolefi ali fako nehae hu¹na nehue. ²⁰ Anumayamo kave¹ma negahe melitalu hayanagi tolefima ali fako haya yatamia haneafe Anumayamo kave lama nonae. ²¹ Ani kave¹ma negahema melitalu hayana nago¹a veafena amakava nohagi tamahaote tamakaitami alitama aya kavela nenage¹ya nago¹a veala amakala nelege¹ya nago¹a vea¹mo¹ya nofi alagamo tina ne ha¹no hute¹ya anegi vaya kana hu¹ya nemaiye. Na¹a havi kava nehutama Anumayamo kave¹mona aepa¹a havilama ohutama afa¹a nena. ²² Na¹a higetama na¹a kavala nehae? Kave¹ma lima nesaya notamia omaleo? Netetama eho. Anumaya Kotife havi¹ya amakupi malenaya veafena “Afa vea kana nehae.” hutama nehutama kave¹amima omalea veafena “Afa vea kana nehae.” hutama amakaye hisifa kavala nehao? Ani kava¹ma hayana “Kanale kava nehae.” hu¹na hisuo? A¹ao “Tusi¹a havi kava nehae.” hu¹na nehue.

Yisasi¹a kai hame mayaene nofi alagamo tima¹aene anaga¹amogamina amamine.

²³⁻²⁴ Anumayamotegati ali-mainoa kegi¹na ago tamahapai-mainoa kemo¹a ma¹a humaine Yutasi¹a Yisasina agesi huno avaleno kame vaya amayapi atenea kegela Alatimo¹a Yisasi¹a kai hame kana maya alino Anumayamotega muse huno nunamu huteno aposino ne¹amamino mage huno hie “Mamona nagai¹ni naugafae.

Tamakai tamaya hisiafene hu'na naugafa haki'na nelamamugi nagai'fena tamakesa havi havi nehutama nete nete hume hume haiho.” huno hamapaiye. ²⁵ Hige'ya ani kavela netageno ani'a huno nofi alagamo ke'ayola alino mage hie “Nagai kolama laki lavisia kanafina Anumaya Koti'a haegafa alino hagelafi lamatesia kea ali fatago hisia yana havisaya yafe muki'a kanafina mani ke'ayopiti nofi alagamo tina nenetama nagai'fena tamakesa havi havi hutama maiho. ²⁶ Ani mayaene nofi alagamo ti'ene nenetamahena Anumayatimo'a tagaife huno fali-mainea aepa'a huhaletama hugahae. Ani'a hume ne'visigeno Anumayatimo'a eteno esie.”

Tagaitia tagu'amona fako huta ageteta Anu-mayamo kavela nesune.

²⁷ Nago'a vea'mo'ya kai hame kana mayaene nofi alagamo tife'enena amaku'a fakoa ohu'ya afa'a nesayana Anumayamo augafaene kolama'aene alihaviya nehae. Anumayamo aufina kefo au'ava kava nehae. ²⁸ Ani yafe muki'a vea'mogatama Anumayamo mayaene nofi alagamo ti'ene nenutamahena hagotetama tamahaote tamahaote tamaku'a fako hutama agetetama “Kefo yana humaino?” hutama tamakesa havitetama tamaku'amo'ma kanale hu-mainesigetamahena neho. ²⁹ Nago'a vea'mo'ya kai hame mayaene nofi alagamo ti'ene nene'ya Yisasi'ma tagaife huno augafa hakino fali-mainea aepa'ahema ohavi'ya afa'a nenesaya vea'mogamina Anumaya Koti'a

kaiyekea humateno anona'amia amamigahie.
³⁰ Na'a kava'ma humainea yafenagi'ya tamakaipitila nago'a veala amaugafamo'a fulu fulu hige'ya kalia alige'ya nago'a veala ago fali-mainae. ³¹ Tagaya hagoteta tagu'a havita ali fako huteta note'asina Anumaya Koti'a kaiyekea hulateno anona'a otamile'asine.
³² Anumayamo'a haenaga agai kema nohaviya vea'ma kaiyekea humateno anona'a amamisia kavala tagaila otamisiafe menia tagaya kefo yama nehunageno'a fako hulateno mai fatago huta maisunafe ka'yona nelamie.

³³ Nafu'nagana-gatama na'a humaineafe Anumayamo kave'ma negahena melitalu hutetama kanale'ya hutama nago'a veafena amakava mainege'ya muki'amo'ya esagetama nagopi tamako'ya aye-mainetama ani kavela neho. ³⁴ Havigu kefo yama nehutama Anumayamo kave'ma nesayana Anumaya Koti'a kaiyeke hulamateno fako hulamateyafenagi nago'a vea'mogamima tusi'a amakatesige'yahena no'amifinagati nete'ya esae. Nago'a kea haneanagi'na tamakaitegama esua kanafina tamahapaigahue.

12

Alu Aotage Avamu'mo'a alu'a lu'a tokiya nelamia yafe humaine.

¹ Nafu'nagana-gatama menia Alu Aotage Avamu'mo'a tokiya ne'amamia ke havisae hu'na nehue. ² Nayona Yisasi kema ohavinaya

kanafina Satani'a tamavayu higetama agea o'aino ago fali-mainaya veafena “Anumayati mainae.” hutama amakisana ne'vaitama havi kate umainaya yafena tamakaya ago havilinae. ³ Anumaya Koti Avamu'mo'a nago kanomo agu'afima mainesigeno'a mani kea ohugahie “Anumaya Koti'a Yisasife hai vaiteno hani yapi maiyo huno hutesie.” huno Yisasina hu-haviya hu o'ategahie. Nago kanomona Alu Aotage Avamu'ma agupi omainesia kanomo'a “Yisasi'a Alani'amo maine.” huno ohugahie.

⁴ Anumayamo ali'ya aligahe alu'a lu'a muse yamo tokiya nelamianagi nagoke Alu Aotage Avamu'mo nelamie. ⁵ Anumayamo ali'yana alu'a lu'a ali'ya hanegeta ne'alunanagi nagoke Anumaya maine. ⁶ Mainegi alu'a lu'a ali'ya alisuna tokiyatia hanegeta ne'alunagi nagoke Anumaya Koti'a ali'yama'a alisuna tokiya nelamianagino agai'a ali'yana ne'alie. ⁷ Muki'a vea'ne amaya hisunafe Avamu'mo'a tokiya'a tave-nelino tahaote tahaote tamine. ⁸ Alu Aotage Avamu'mo'a nago'a vea'mogamina Anumaya Kotina agu agesaene kea hamapaisia tokiya amamiteno nago'a vea'mogamina falaki-mainea kemo aepa'a havisaya amaku amakesa amamine. ⁹ Ani Avamu'moke'ya nago'a vea'mogamina Anumayamofe havi'ya tokiya'age amametiti hisaya amaku'a ne'amamino nago'a vea'mogamina kalima ne'aliya vea'ne ali'ya kanale humatesaya tokiya nagoke Avamu'moke'ya amamine. ¹⁰ Nago'a

vea'mogamina tokiya'age avame yama hisaya tokiya ne'amamino nago'a vea'mogamina Anumayamo kea amakupinaga humainea kea huhale'ya hisaya tokiya amamine. Nago'a vea'mogamina havilama hu'ya fako hisaya tokiya amamige'ya “Mani kavala Anumayamo Avamu'mo nehio? Ve'a'mo'ya amaku amakesafiti nehao? Kefo Avamu'mo nehio?” hu'ya havisaya tokiya amamine. Nago'a vea'mogamina nohaviya kefiti alu amake alu amakefiti hisaya tokiya amamine. Ani kemonā aepa'a hu yahae hu'ya hisaya tokiya nago'a vea'mogamina amamine. ¹¹ Haote haote tokiya nagoke Avamu'moke'ya tamine. Agai'a haiya kava huno tahaote tahaote alu lokiya alu lokiya fako huno lamine.

Tagaya muki'amogata nagoke augafamo augafa atupa-tapa'a mainone.

¹² Taugafafitila taiya, tayana, taulaga aote aote haneanagi taugafa nagoke yane. Ani'a huta Kalaisife havita lagupi malenona veala alu vea'ne alu vea'ne mainonanagi muki'a veala Kalaisina nagoke augafa mainone. ¹³ Nagoke Avamu'mo'a tina falelamatea kava huno nagoke augafale alino aika'maelategeta Yuta vea omainaya vea'nene, Yuta vea'nene, nofipi maine'ya mone o'ali ali'ya vea'nene, miya'amima alisaya ali'ya ne'aliya vea'nene alino aiga'maelategeta nagoke taugafa mainonageno nagoke Avamu'mona timo'ma hia kava huno ani li nesunafe nelamie.

14 Taugafa nagoke yama'agela omalegi taugafafitila taiya, tayana, taulaga hane. 15 Aiyamo'a "Nagaya ayana omainoafe mani augafafiti kanoa omainoe." huno'ma hisiana havige afa'a ani augafafiti kano maine. 16 Agesamo'a "Aulaga omainoafe mani augafafiti kanoa omainoe." huno hisiana havige afa'a ani augafafiti kano hane. 17 Muki'a augafafima aulaga'age'ma hanele'asina hana'a huno agesa havile'asine? Muki'a augafafima agesama hanele'asina hana'a huno mana havile'asine? 18 Na'a ohunegi Anumaya Koti'a agesa haviteno agai'a haiya kava huno taulaga, taiya, tayana talo hulateteno aote aote yana nagoke taugafafina alino malete malete higeno hane. 19 Nagoke yama'age'ma hanesina muki'a laugafa omalesine. 20 Alu tupa-tapama alino talo higeno'a taiya, tayana haneanagi nagoke taugafale hane.

21 Aulagamo'a ayafena "Kagayama omaite'asina nagaya kanale'ya hu'na maule'asine." huno ohugahie. Anumo'a aiyahena "Kagayama omaite'asina nagaya kanale'ya hu'na mausine." huno ohugahie. 22 Na'a ohugahigi nago kaiyaga taugafamofema "Tokiya'a omalene." huta nehunanagi ani kaiyaga taugafamo'a tusi'a aliyama'a hane. 23 Nago kaiyaga taugafamofena "Afa ya kana humaine." huta ali hilato hune'atonanagi tagaye hisuna kaiyaga falakita kena fai ne'alune. 24 Fai ne'alunagi kanale'ma humainea kaiyagatia afa'a kena nofaunagi Anumaya Koti'a agai'a agesa

haviteno muki'a laugafa talo humaleteno afa ya kana huno haviya humainea taugafamo kaiyaga kanale'ya huno agia alisaga nehie. ²⁵ Muki'a laugafamo'ya ali fako ohisayafe ani kavala humalegeno "Nagoke taugafa hane." nehuta nago avamete maineta kava yagai-mainone. ²⁶ Nago kaiyaga taugafamo'a tagatama aiyana muki'a laugafamo'a tagata ne'aiye. Nago kaiyaga taugafamo'a ala agima aligeno'a muki'a taugafamo'a muse nehie.

²⁷ Lamakaya muki'a Yisasina augafa aiya, aya, aulaga'a mainae. ²⁸ Yisasife havita lagupi malenona vea'mogatama nagopima maunana alu ali'ya alu ali'yana Anumaya Koti'a agai'a huyogino lamine. Hagoteno Aposolo vayala humateteno anile Anumayamo amakupi humainea kema huhale'ya hisaya veala humateteno anile Anumaya Koti ke huge amavelige hisaya veala humateteno anile tokiya avame yama hisaya veala humateteno anile kali vea ali hetimatesaya veala humateteno anile vea amaya hisaya veala humateteno anile kava veala humateteno anile amakesamo'a nohavia kefiti hisaya vea'nene alino hetimatene. ²⁹ Muki'a vaya'mogata Aposolo vaya mainao? Ifi muki'a vea'mogata Anumayamo amakupi humainea kea huhaletama hisaya vea mainao? Ifi muki'a vea'mogata huge amavelige ali'yana ne'aliyo? Ifi muki'a vea'mogata tokiya'age avame yana nehao? ³⁰ Ifi muki'a vea'mogata kalima aliya veala ali kanale hune'amatao? Ifi muki'a vea'mogata tagesamo'a ohavinea kefitila nehao?

Ifi muki'a vea'mogata ani amakema aiya kea hu yahae hutama nehao? ³¹ A'ao na'a nohunagi tamakaya Avamu'mo uhagote hanea muse yana alisayafe tokiya'age huno tamahaisie hu'na nehue.

Tagaya nago'a veala taipa amamisune.

Menia nagaya nago yamo'a lamage huno uhagote hanea au'avafe tamahapaigahe hugi haviho.

13

¹ Nagaya nohavua kefiti hu'na mopale vea'mogami amakene Ensole vaya amakene aisuanagi vea'mogamife nahau nayamopafi onahaisige'na yave'yaene velo'ene afa'a aiko nelugeno kema ayeso nehia avamete hu'na afa kegefa nehue. ² Anumayamo'a avayafiti nahapaiya kea huhale'na nehu'na Anumaya Koti'a falaki-malenea kemona aepa'a muki'a havilama humainoanagi veafe nahau nayamopafi onahaisiana afa ya kana hu'na mainoe. Anumayamofena havi'na nametititia hute'na "Ago'yamoga alule vuo." hisugeno ani ago'yamo'a nagai ke havino visianagi veafena nahau nayamopafi onahaisiana afa ya kana hu'na mainoe. ³ Veafema nahau nayamopafi onahaisige'na mone afeno'ami omalenesia vea'ne muki'a yani'a amamisuana ani yamo'a naya ohugahie. Veafema nahau nayamopafi onahaisige'na Anumayamo kema huhale'na nehisuge'ya hamai vainate'ya

navale'ya atafi natalesageno naugafa leno asagalisia yamo'a naya ohugahie. ⁴ Veafe hamau amayamopafi nehamaiya vea'mo'ya haviyama humatesage'ya mailava hu'ya maine'ya anona'amia huo'amate'ya kayone'age vea'ne mainae. Alu kanomo yate age hama'ye hu'ya amaipamo'a haviyana ohige'ya amaugafa ali'ya ohai vea'ne mainae. ⁵ Amakai'ami amakia alisaga hu'ya veganokanola nohae. Amakai'ami yafekela amakesa havi havi nohae. Aupa'a hamaiya no'vaiye. Havi kava'ma humataya veafena amakesa ohavi'ya afa'a ne'atalae. ⁶ Veafe hamau amayamopafi nehamaiya vea'mo'ya nago kanomo'a kefo yama hisia yafena muse ohugahagi tamage kelefe musena hugahae. ⁷ Veafe hamau amayamopafi nehamaiya vea'mo'ya haviya humatesaya vea'mogamina o'amatalegahagi Anumayamo amaya hisiafe amametiti nehu'ya agava maine'ya mai lokiya vai'ya nemaiye.

⁸ Ma ma hamau amayamopafima nehamaiya yana hanege hanege huno hanegahianagi Anumayamo amakupi humainea kema huhale'ya hamapaiya kemo'a ha'no hugahie. Amakesamo'a nohaviya kema nehaya yamo'a ha'no hugahie. Falaki-mainea kemo aepa'ama havilama nehaya yamo'a fanane hugahianagi hamau amayamopafi nehamaiya yana agola ha'no ohugahie. ⁹ Ha'no ohugahigi havimainona yamo'a nago kaiyaga'a havilama ohunone. Anumayamo'a lagupi humainea kea huhaleta

nehunanagi nago kaiyaga'a havilama ohunone.
¹⁰ Havilama ohunonagi fatago kavake'ya nehisia kanomo'a, Yisasi'a, muki'a yafena havilama hulineanagino esigeta havilama ohuneta nehuna yamo'a fanane hugahie.

¹¹ Nagaya osi nafa'nema mainoa kanafina nafa'nemo'ma nehia kea nehu'na nagesa havi havi humainoanagi ko hute'na ala kanoma mauvana nafa'nemo'ya nehaya kavala ago atalenoe. ¹² Meni kanafina tagaya haniko'mako yapi maineta Anumaya Koti augosa galasifima tamema agona avamete kava nehuta agelama huta no'agonanagi haenaga'a Anumayamo augosa ne'ageta agelama hugahune. Meni kanafina Anumayamo kea havilama nohunanagi Anumayamo'a nagaila nagelama humainea kava hu'na haenaga'a nagaya agaila agelama hugahue.

¹³ Anumayamofe havita lagupi maleta tametitima humainona ya'ene "Anumayamo'a hulamategahue huno humainea yana hugahie." huta lametiti nehuna ya'ene veafe tahau tayamopafi nelahaiya kava'ene ani tagufa (3) yamo'a hanege hanege huno hanegahianagi tahau tayamopafi nelahaiya yamo'a uhagoteno mani tole yamona agaseno tama yatafa hane.

14

Anumayamo kea huhaletama hisaya yafena tusiya huno tamahaino.

1 Hagotetama veafena tusiya huno tamahau tamayamopafi tamahaino. Anile Alu Aotage Avamu'mo lamamisia tokiya alisaya yafe musena nehutama tusiya huno tamahaino. Ani tokiya yapiti hagotetama Anumayamo'a tamakupima humainea kema huhaletama hisaya tokiyahena tusiya huno tamahaino. 2 Amakesamo'a nohavia kema hisia kanomo'a veala hamanopaigi Anumaya Kotina agai'age hanepaiye. Vea'mo'ya ani kea nohavigi falaki-mainea kea Avamu'mo hapaigeno humaine. 3 Humainegi Anumaya Koti'a amakupi humainea kema huhale'ya nehaya vea'mo'ya nago'amogami amametitia ali lokiya vaimatesaya kene amaya hisaya kene huhale'ya humatenae. 4 Nohaviya kefiti nehaya vea'mo'ya amakai'ami amaku'amo tokiya vaisia yana ne'amiyanagi Anumayamo'a amakupi humainea kema huhale'ya hisaya vea'mo'ya Yisasife havi'ya mono nopi melitalu nehaya vea'mogamina amaya nehae.

5 Muki'a veala amakesamo'a nohaviya kefiti hisage'nahena muse hugahe huanagi muki'a veala Anumaya Koti'a tamakupi humainea kema huhaletama hisage'na aluya hu'na musena hugahue. Anumayamo kema huhaleno nehisia kanomo'a agesamo'a nohavia kefiti nehisia kanomona agase-maineanagi ani kea hu yahae hisige'ya Yisasife havi'ya melitalu humainesaya vea'mo'ya havisageno hama'maeno amametita ali lokiya vaigahie.

6 Ani yafe nafu'nagana-gatama tamakaya

mainesalega uva¹yi hu¹na ohavinesua kefiti¹ma tamahapaisugetama ohavisayana ani kemo¹a tamaya ohugahianagi Anumayamo aepa¹a havilama hu¹na mani kene Anumayamo¹a falaki-malenea kene Anumayamo¹a nagupi humainea kene huge hamave-lige hu¹na huhale¹na hisugeno ani kemo¹a tamaya hugahie.

7 Nagi vea¹mo¹ya kepitilene otofitilene yagamema hufatago hu¹ya ohisayana vea¹mo¹ya havilama hu¹ya ohavigahae. 8 Nago kumate¹ma tuma hugahe keha kehama hisage¹ya havilama ohisaya kema hisayana vaya¹mo¹ya hana¹a hu¹ya havite¹ya kamea hugahae? 9 Tamakaya ani¹a humainae tamakesamo¹ma ohavinesia kema hisage¹ya hana¹a hu¹ya ani kea havigahae? Ani kemo¹a yasimo¹ma hia kava huno fanane hugahie. 10 Ma mopafi vea¹mo¹ya alu amake alu amake ne¹aiyanagi muki¹a ani kemo¹a afa yana omalegi ani kema nehaviya vea¹mogami aepa¹aene ke hane. 11 Haneanagi nago kanomo¹a alu kefiti, nohavisua kema hisige¹na “Ohavua ke nehianagi¹na ani kanoenena tokae¹na omaigahue.” hu¹na hugahue. 12 Tamakaya Anumayamo ali¹yama aligahena Avamu¹mo¹a tokiya¹ama tamamisia yafena aluya huno¹ma tamahaisiana Yisasife havi¹ya amakupi malenaya veala amaya hutama ali lokiya vaimatesaya ali¹yamo tokiyaheke¹ya aluya huno tamahaisie.

13 Ani yafema ohavinesia kefiti¹ma hisia kanomo¹a ani kea hu yahae hisia tokiya

alisia yafena Anumayamotega havigesie. ¹⁴ Nagesamo'a ohavinesia kefiti Anumayamotega havigesuana ani kea nagesamo'a nohavianagi nagu nafa'nemoke ani kea huno havinege. ¹⁵ Ani yafena na'ane hisue? Nagesamo'a nohavia kefiti nagu nafa'nemo'a Anumayamotega havigege'na nagai'ni'a havua nagesaene Anumayamotega havigegahue. Mono yagamea nagesamo'a nohavia kefiti nagu nafa'nemo'a hugahianagino nagai'ni'a nagesa havimainoa mono yagamene hugahue. ¹⁶ Ani'a ohisanana kagu nafa'nemoke kagesamo'a nohavia kefitila Anumayamo agia alisaga hisige'ya nago'a ani yafema ohavinesaya vea'mo'ya kema hana kea nohaviyafe hana'a hu'ya “Tamage nehie.” hu'ya Anumayamo agia alisaga hugahae? ¹⁷ Kagaya Anumayamofe muse huka kanale'ya huka agia alisaga nehananagi amakaya ohavisayana amaku'a ali lokiya vai no'amatane.

¹⁸ Nagaya muki'a veala amakase'na nohavua kefitila tusiya hu'na nehua yafena Anumayamofena muse nehue. ¹⁹ Muse nehuanagi Yisasife havi'ya mono nopi melitalu hisafina huhale'na hisugetama havilama hisae hu'na tagaiti kefitila faefu'a (5) ke kano'a osi'a tamahapaisuana teni tauseni'a (10,000) kema nagesamo'a nohavisia kefiti hisua kemono agasegahie hu'na nehavue.

²⁰ Nafu'nagana-gatama kefo yama hisaya yafena nute nafa'nemo'ya nehaviya amakesamo avamete hu havitama maiho hu'na nehuanagi

alopa vea'mo'ya nehaviya amaku amakesamo avamete havitama kanale'ya hutama ma ma Alu Aotage Avamu'mo'a tokiyama tamamisia kema tamahapauva kea fako hutama nafa'nemo'ya nehaviya avamete tamaku tamakesa ohaviho.

²¹ Anumayamo'a mage hige'ya avopina kae-malenayane

“Yuta veafe nayona mage hu'na humainoane 'Nagai'ni veafe alu vea'mogami kefiti hamapaisuanagi ani'a hu'ya veganokano nehu'ya nagai kea havi'ya akave omalegahae.' huno humainayane.”

²² Na'a humaineafe ohavinesia kefiti nehisage'ya Yisasina amakave'no hutenaya vea'mo'ya havi'ya Anumaya Kotina tokiya avame yama'a ne'age'ya “Anumayamo kea tamage nehie.” hu'ya hisayafe amave-lianagi Yisasife havi'ya amakupi malenaya veafe ani avame kea nohigi Anumaya Koti'a avayafiti humainea kema huhale'ya nehageno amaya nehie.

²³ Yisasife havi'ya melitalu hisafina muki'a vea'mo'ya nohavisaya kefiti kema hisage'ya ani kava'ma o'agenesaya vealo Yisasina amakave'no hutenaya vealo me havisayana hinage'ya “Havigunagu kava nehae.” hu'ya hugahae.

²⁴ Hugahagi muki'a vea'mo'ya Anumayamo'a amakupi humainea kema huhale'ya nehisage'ya ani kava'ma o'agenesaya vealo Yisasina amakave'no hutenesaya vealo hainefale'ya havinu'ya Yisasife huhale'ya hisaya keleti amakai'ami “Kefo ya nehune.” hu'ya hisageno

hisaya kemo¹a amakaila kaiyeke humateteno fako humategahie. ²⁵ Fako hamaisige¹ya amakupima falaki-mainesia yana falote hisige¹ya agete¹ya Anumaya Kotite ape hu¹ya Anumaya Koti agia alisaga nehu¹ya “Anumaya Koti¹a tamakai¹ene maine.” hu¹ya hugahae.

Muki¹a Anumayamo agima alisaga hisuna au¹ava kavala fatago kavake¹ya hisune.

²⁶ Nafu¹nagana-gatama na¹a hisaya yafena na¹ane hisune? Melitalu hisayana nago vea¹mo¹ya yagamea hisage¹ya nago vea¹mo¹ya Anumaya Koti kea hisae. Nago vea¹mo¹ya Anumayamo falaki-malenea kea agupi hapaiya kea huhaleno hisayana nago vea¹mo¹ya Avamu¹mo aminea kea agesamo¹a nohavia kefiti nehisageno nago vea¹mo¹ya ani kea hu¹ya aiyahae hisae. Ani kavake¹ya hutama veala amaku¹a ali lokiya vaisaya kea hiho. ²⁷ Nago¹a vea¹mo¹ya amakesamo¹a nohaviya kefiti¹ma hinu¹yahena tolemoganio tagufa vea¹mo¹yao amahaote amahaote hisage¹ya nago¹a vea¹mo¹ya ani kea aiyahae hiho. ²⁸ Ani kema aiyahae hisia kanoma omainesige¹ya mono nopina ani kea ohu¹ya amakupinaga Anumayamofena ani kea hisae. ²⁹ Tolemoganio tagufa vea¹mo¹yao Anumaya Koti¹a amakupi humainea kea huhale¹ya hisage¹ya nago¹a vea¹mo¹ya ani kehena amakesa havi havi hu¹ya fako hu¹ya haviho. ³⁰ Nago kanomo¹a Anumaya Koti kea huhaleno nehisigeno Anumayamo¹a

nago kanomona agupi kea nehisigeno'a hagote kanomo'a kea ohuno mainesigeno anile kanomo'a kea hisie. ³¹ Muki'a vea amaya hisage'ya havi'ya kanale'ya hu'ya mai-lokiya vaisayafe muki'amogatama tamahaote tamahaote Anumaya Koti'a tamakupi kea higetama huhale'tama hiho. ³² Anumayamo'a amakupi humainea kema huhale'ya hisaya vea'mo'ya mani kea hisaya yafe'ene ohisaya yafe'ene amakai'ami amaku'ale kava yagai'ya mainae. ³³ Anumaya Koti'a haviya havaya hisaya kavafena nohaigi ako hutama maisaya yafe nehaiye.

Muki'a Yisasife havi'ya melitalu nehaya vea'mogami ani kava nehae. ³⁴ A'nemo'ya mono nopina kea ohu'ya ako hu'ya maiho. Kahegi kema akave male'ya anau'amimo amaiyafinaga maine'ya mono nopina ke havi'ya nago kea ohu'ya maiho. ³⁵ Nago kemo'a kanama hamaisige'ya no'amifinaga umaine'ya anau'amimona ani kehena hamavigesae. A'nemo'ya mono nopina kea hisayana amakaye hisia kava hugahae.

³⁶ Yisasi kanale mono kea hagoteno tamakaipiti falote humaineo? A'ao ani'a ohune. “Tagaitige havimainone.” hutama nehao? A'ao ani kemofena veganokanola ohiho. ³⁷ Nago kanomo'a “Anumayamo'a nagupi kea hige'na huhale'na hisua kano mainogeno Avamu'mo tokiya namige'na mainoe.” huno hisia kanomo'a ma ma kae-malenoa kemono “Anumayamo ka-

hegi kehe humaine.” huno hise. ³⁸ Manima hua kema amakave¹no hutesaya vea¹mogami kea ohaviho.

³⁹ Nafu¹nagana-gatama Anumayamo kea huhaletama hisaya tokiyahe aluya huno lamahaigahianagi amakesamo¹a nohavia kefiti¹ma hisaya veafena “A¹ao.” hu o¹amateho. ⁴⁰ Muki¹a kava¹ma mono nopima melitalu hutama nehaya kavala kaliso o¹atitama fatago hutama hisaya kavake¹ya hiho.

15

Kalaisi¹a ago fali-mainefiti eteno heti-maine.

¹ Nafu¹nagana-gatama Yisasi¹a hulatenea kanale mono kema huhale¹na tamahapai-mainoa kea nago¹ene hu¹na tamakesa ali hao hugahe nehue. Mani kea havitama tamakupi maletama tamametiti hutetama ago hetitama mainae ² Ani kanale kea atafa hulinesageno Anumayamo¹a tamaku tamamena aligatigahianagi afa¹a amega tamaugafaleti¹ma “Yisasifena nagu¹a aminoe.” hutama hisayana tamaku tamamena aliokatigahie.

³ Anumayamo¹a nahapaige¹na havimainoa kemo¹a uhagoteno agase-mainea kea mage hu¹na tamahapai-mainoe Anumayamo avopi kae-malenea kate Kalaisi¹a kefo yama humainona yatefene huno fali-maine. ⁴Falige¹ya hevaitageno tole yupa komufinaga hanetegenog tagufa (3) kanale avopima kae-malenea kate maleno Anumaya Koti¹a avale heti-maine.

⁵ Eteno hetiteno Pita aule eva'yi huteno haenaga'a agai'a aleveni'a (11) anagatela va'yi humaine. ⁶ Va'yi hige'ya faefu hataleti'a (500) alitalu humainaya tafu-taganate eva'yi humaine. Ani veala osi'a falitageno kasago'ya veala ofali'ya afa'a mainae. ⁷ Anile Yemesi mainele eva'yi huteno haenaga'a muki'a Aposolo vayatela eva'yi hige'ya age-mainae.

⁸⁻⁹ Na'a huteno haenagalafa nagaitela eva'yi humaine. Kalaisina akave nehaya veala nagaya tusiya hu'na ali haviya humatenoafe Aposolo kano maisua yafena onatenegi muki'a Aposolo vayala nagaila nagasege'na osi vaya kana hu'na maige'na a'mo'a kana'a omalegeno nafa'ne atea kava huno Anumaya Koti'a agai'a nafa'ne nategeno Kalaisi'a faliteno nagaitela eva'yi humaine. ¹⁰ Anumaya Koti'a agai'a kayone yama'a namineafe Aposolo kanoa mainoe. Kayone yama'a naya hige'na nago'a Aposolo vaya'mo'ya ali'yama ali-mainaya ali'yana amakase'na ne'aluanagi nagaya omagi Anumaya Koti kayone yama'amo naya higeno nagai'ene haneafe ali-mainoa ali'yamo'a amakase-mainae. ¹¹ Nago'a Aposolo vaya'mo'yao nagayao tamahapauna kea lagaya muki'amogata nagoke kege'ya huhaleta humainona kele havitama tamakupina malenae.

Haenaga'a muki'a fali-mainaya veala hetigahae.

¹² “Kalaisi'a ago fali-mainefiti heti-mainae.” huta nehunagi na'a higetama nago'a

vea'mogatama “Fali-mainaya veala ete'ya heotigahae.” hutama nehae? ¹³⁻¹⁴ Fali-mainaya vea'ma he-otinale'asine Anumayamo'a Kalaisi'enena fali-mainefitila ali heti-o'atele'asine. Kalaisina fali-mainefiti'ma ali heti-o'atele'asina nagayama nehua kea afa ke kana higetama tamakaya afa yafe tamakupina maletama tamametitia hale'asine. ¹⁵ Anumaya Koti'a Kalaisina alino heti-o'atenesina tagaya “Anumaya Koti'a Kalaisina alino hetitene.” huta nehuna kemo'a Anumaya Kotife havige hute'asine. Anumaya Koti'a fali-mainaya vea'ma alino heti-o'amatele'asina Kalaisi'enena alino heti-o'atenele'asine. ¹⁶ Tamage Anumaya Koti'a vea'ma fali-mainafiti ali heti-omatenele'asina Kalaisi'enena ani'a huno alino heti-o'atenele'asine. ¹⁷ Nagi Anumayamo'a Kalaisima ali heti-o'atenesina tamakupi maletama tamameti nehaya yamo'a afa ya kana higeno kefo yama nehaya yatamimo'a aigagilamateno lamatafa hile'asine. ¹⁸ Kalaisife havi'ya amakupi malet'e'ya fali-mainaya vea'mo'ya hani'mo agu'afi agola amakata aiya no maile'asine. ¹⁹ Kalaisife havita tagupi malona yana ma mopale mainona kanafike'ya taya hile'asina haenaga faliteta hetita ikapinaga ohaute'asina Kalaisife havita lakupi malenona yamo'a afa ya kana hule'asinagi haenagama va'yima hisia yafe tamage huta lametititia nehune. ²⁰ Tamage Anumayamo'a Kalaisina fali-mainefiti ago alino hetiteneane. Hoyafi kave'mo'ma hagoteno nena hia avamete

huno Kalaisina hagoteno ali hetiteneanagino haenaga¹a fali-mainaya veala alino hetimategahie. ²¹ Nagoke kanomo¹a, Atamu, kefo yama humainea yateti fali yana ali falote humaineanagi nagoke kanomo¹a, Kalaisi¹a, fali-mainea yateti ani¹a huno tagaya vea¹mogata heti yana ali falote humaine. ²² Ma¹a humaine Atamu muki¹a nelafa maineafe muki¹amogata agayama humainea kava huta nefalunanagi Kalaisi¹enema aiga¹maeta mainona vea¹mogata agayama humainea kava huta eteta hetita haegafa vea¹ne maigahune. ²³ Anumaya Koti¹a malenea kana¹ale Kalaisi¹a hagoteno hetimaineafe agayama eteno esia yupa muki¹a Kalaisife havi¹ya amakupi malenaya vea¹mo¹ya fali-mainesafiti hetigahae. ²⁴ Hetitesageno ani kanafi muki¹a yana ha¹no hisigeno Kalaisi¹a muki¹a ma mopale kava vaya¹ene Anumaya Koti kame vaya¹aene Kefo yamo tokiyama hanea Avamu¹yagaene Kalaisi¹a amakaseno ani vaya¹mogamina ali ha¹no humaleteno Anumaya Kotina kava yagaisiafe Nefa ayapi muki¹a amategahie. ²⁵ Kalaisi¹a yagaime yagaime haino muki¹a kame vaya¹a amakaseno aiyafinaga alino amategahie. ²⁶ Kalaisi¹a kame yana ali ha¹no humaleteno haenagalafa vea¹ma nefaluna yana heno fanane hutalegahie. ²⁷ “Kava yagaisiafe muki¹a yana Anumaya Koti¹a Yisasi aiyafi malene.” huno kae-maleneane. Mani kea “Muki¹a yana malene.” huno humainea kea Anumaya Koti¹a, kava yagaisiafe muki¹a yana

Yisasi aiyafi malenea kanomofe ohune. ²⁸ Ani kavala humaleteno muki'a yana agaseno kava yagai-mainea kano Kalaisina, Anumaya Koti'a aiya'afi ateteno Anumaya Koti'a muki'amo'ya hagote kava kano maigahie.

²⁹ Yisasi'a fali-mainefitila heotinele'asina nago'a vea'mo'ya fali-mainaya veafena amakesa havi'ya mono tima nefalayana na kanale ya falote hugahie? Fali-mainaya veala heotisyana na'a hinage'ya fali-mainaya veafena havi'ya tina nefalae? ³⁰ Tagaya Anumaya Koti kea huhaleta nehunage'ya muki'a kanafina ka'yo kevea lamigeta falisuna kavala nehune. Vea'ma heotisyana na'a higeta ani hu nelataya kavala afa'a ne'alune? ³¹ Nafu'nagana-gatama tamagelafa nehue muki'a kanafina ka'yo keve namige'na faligahe huanagi Yisasi Kalaisi Anumayatimo'ene ailokae'na maine'na agai kema tamahapaugetama havimainaya yafena aluya hu'na musena nehue. ³² Ma mopafi yafeke'ya nagesa nehavi'na Efesusi kumate mainaya vayala, kave'age afela afu kana nehaya vaye'ene keleti tua nehuanagi'ya fali-mainesaya vea'ma heotisyana ani kava'ma hunenataya yamo anona'a hana'a hu'na alisue? Falimainesaya veala heotisyana vea'mo'ya nehaya kea “Ega falisupi afa'a maineta ti'ene kave'ene neta kanale'ya huta maigahune.” hu'ya nehaya kemoni akave malegetao.

³³ Havigema nehaya vea'mogami kea ohaviho. Fatago vea'mo'ya kefo yama nehaya vea'nene

maisayana ali haviya hulamategahagi ka'yetama maiho. ³⁴ Tamakesa hao hinagetama kefo yama nehaya yana ataleho. Nago'amogatama Anumaya Kotifema ohaviya yafena tamakaye hino hu'na nehue.

Faliteta hetisuna taugafa haote ya kana hugahie.

³⁵ Nago'a vea'mogatama mage hutama nahavi-negae “Hana'a hu'ya fali-mainesaya veala hetigahae? Fali-mainesaya vea'ma hetisayana hana augafa amaugafa hanesige'ya eva'yi hugahae?” hutama nahavi-negae. ³⁶ Nahavi-negaya vea'mogatama havigu ke nehae. Avina yama mopafi fai-malenageno falino numayu ohisigeno'a ohagegahie. ³⁷ Hageno va'yi hige-tamahena fai-malenaya avina kana ohunegi osi avina alaga kano'a viti avinafi alu avina yapi osi kano'a fai-nemalae ³⁸ Fai-malenageno Anumaya Koti'a agha haviteno haiya kava huno avina yana alu augafa alu augafa amigeno nehage. Anima nehagea avamete huno Anumaya Koti'a fali-mainesaya veala alu amaugafa amamiteno ali hetimategahie.

³⁹ Muki'a yamona nagoke augafa okaline. Veala alu laugafa kali-maigeno afu kalamogamina alu amaugafa kali-maigeno namayaga-mona alu amaugafa kali-maigeno noyameyaga alu amaugafa kali-maine.

⁴⁰ Ikapinaga yana alu amaugafa kali-mainegi ma mopafi veala alu amaugafa kali-maine. Mopale veala konagali ya'amia

haneanagi ikapinaga veala alu'a konagali ya'ami hane. ⁴¹ Yagemo'a alu konagali yama'a hanegeni ikamo'a alu konagali yama'a hane. Ka'nefi'yagamona alu konagali yama'a haneanagi nago'a ka'nefi'mona alu konagali yama'a haneanagi nago'a ka'nefi'mo'ya alu konagali ya'ami'a hane.

⁴² Fali-mainaya veala falige'ya hevaimataya amaugafa kasalisia amaugafa haneanagi ete'ya hetisaya amaugafa agola hanege hanege huno fanane ohisia amaugafa hanegahie.

⁴³ Hevaimatesaya amaugafa amakaye hisia amaugafa haneanagi ete'ya fali-mainesafiti hetisayana tokiya hale yama'a hanesia amaugafaene hetigahae. Hevaimatesaya amaugafamona tokiya'a omalenea amaugafa haneanagi ete'ya hetisaya kanafina tokiya'a hanesia amaugafaene hetigahae.

⁴⁴ Hevaimatesaya amaugafa mopa amaugafa hanegeni hetisaya amaugafa ikapinaga amaugafa falote hugahie. Mopale maisuna taugafama hanesiana ikapinaga maisuna taugafaene falote hugahie. ⁴⁵ Na'a humainea yafe Anumaya Koti avopina mage huno kae-maleneane

“Hagote kanoa, Atamu'e, haimula hanea kano falote humaine.” huno kae-maleneane.

Kae-maleneanagi haenagama falote humainea Atamu'a, Yisasi'e, ikapinaga maige maige hisaya hamaimula amamsia kano maine.

⁴⁶ Hagoteno ikapinaga maisuna taugafa falote ohunegi mopale taugafa hagoteno falote huteno

haenaga ikapinaga maisuna taugafa falote hugahie. ⁴⁷ Hagote kanoa, Atamuna, mopaleti aye kakali-feno talo huteneanagino haenaga falote humainea kanoa, Yisasi'a ikapinagati emaine. ⁴⁸ Mopale mainaya veala mopaleti talo humalenea kanomo avamete hu'ya mainagi ikapinagama visaya veala ikapinagati emainea kanomo avamete hu'ya maigahae. ⁴⁹ Menia mopaleti talo humalenea kanomo augafa kali-mai vea'ne mainonanagi haenaga'a ikapinagati emainea kanomo augafa kali-mai taugafa hanegahie.

⁵⁰ Nafu'nagana-gatama tamahanepauve mopafi taugafamo'a Anumaya Koti kava yagai-mainea kumatela o'ugahianagino kasalino fanane hisia taugafamo'a agola maige maige nehaya kumatela o'utafa huno o'ugahie.

⁵¹ Anumaya Koti kema falakino hanea kea tamahapaigahugi haviho. Muki'a Yisasife havi'ya amakupi malenaya vea'mogata ofalita afa'a mainesunageno aupa'a muki'a laugafamo'a alino alu'a hu taugafa hapaegahie. ⁵² Aupa'a aulumaya ko'nelia au'ava kava huno haenagalafa kepiti ufe kalafa kemo'a nehigeno Yisasi'a ikapinagatila efalote hisigeno ago'ma fali-mainaya veala hetite'ya agola maige maige hisaya amaugafa alitesageta ofalita afa'a mainesuna veala anile maige maige hisuna taugafa hapaegahie. ⁵³ Mopafima mainona taugafamo'a negasalianagi haenaga'a okasalisia taugafa falote hugahie. Falisuna taugafa

haneanagi haenaga¹a ofalita agola maige maige hisuna taugafa falote hugahie.

⁵⁴⁻⁵⁵ Negasalia taugafamo¹a fanane hutenageno okasalisia taugafa falote hugahie. Fali yamo¹a fanane hinageno ofalisuna yana falote hisigeno ma ma Anumaya Koti humainea kemo¹a falote huno tamage hugahie. Mage huno kae-maleneane

“Maige maige hisuna yamo¹a falisuna yamona agasetafa humane. Nefaluna yamoga tagasesana tokiyaka¹a hanate hane? Fali yamoga veala amaugafa akafu anika hene-falina tokiyaka¹a hanate hane?” huno kae-maleneane.

⁵⁶ Kahegi kea akave omalonafe kefo yana nehune. Kefo yama nehuna yana akafu amanino vea¹ne hefalisia ya hane. ⁵⁷ Haneanagi Anumayati Yisasi Kalaisi¹a hulatenea yamo falisuna yana ago agase-mainaeafe Anumaya Koti agia alisaga huta muse hisune.

⁵⁸ Nahau-mainea nafu¹nagana-gatama Yisasi-fena tamaku¹a ami hetofa hutama mai-lokiya waitama etetama alu katela o¹viho. Anumaya Koti ali¹yamo¹a afa ya kana ohuno kanale anona¹a alisaya ali¹ya haneafenagitama muki¹a kanafina Anumayamo ali¹yana tokiya¹age waitama aliho.

16

Polo¹a “Mone alitalu hige¹na malanageno Yelusalemu vino.” huno humane.

¹ Yisasi anagala Yelusalemu mainage¹na amaya hisaya mone amamisaya kea hugahe

hue. Kalesia kotega mainaya vea'mogamina hamapauge'ya humainaya kavala tamakaya ani'a hiho. ² Nagaya esua kanafina ani monema alitalu hisaya yafena nonahaigi Sotama'ahe Sotama'ahe alisaya monea ali fako hutama alu vava amamisaya monea alitalu hute hute hiho. ³ Ani kava nehage'na esua yupa tamahaisia vayala hapalisage'na avo kae'na amamite'na humatesuge'ya avo'ene monene ali'ya Yelusalemua ugahae. ⁴ Ugahagi nagaya visua nagesa hisugenofena amakaya nagai'ene ugahae.

Polo'a Kolini mainaya vea'ne momakesia ke humaine.

⁵ Masetonia kotega mainaya anaga'mogamina mogete'na tamakaitega egahue. ⁶ Ne'e'na nago kanafina tamakai'ene yasima alisia ikatela maine'na alulegama ugahe hisugetama nagaila naya hutama ali kate nategahae. ⁷ Anumayamo'a kanalene hisige'na nagayama visuana tamakete'na aupa'a tamatale'na visua yafe onahaigi nago'ene aya'aya kanagefa tamakai'enena maisua nagesa nehavue.

⁸ Efesusi kumate maine'na kave'ma afulesia kanahe muse hisaya imu kisaya kanamo'a falote hutesige'na ugahue. ⁹ Meni kanafina Anumaya Koti'a agai kea hamapaisuafe fita yakinateno tusi'a ali'yana namige'na ne'aluge'ya kasago'ya vea'mo'ya ani kea nehaviyanagi ani kemona kame vava'a kasago'ya vava mainae.

¹⁰ Nagaya Anumaya Koti ali'ya ne'alua kava huno Timoti'a Anumaya Koti ali'ya ne'alianagino tamakaite'ma visiana tamakaife kolia ohuno aipamo'a falu nehinageno kanale'ya huno maino. ¹¹ “Afa kano maine.” hutama hahaviya hu-o'ateho. Falu yapi mainesigetama aya hutama hutesageno nagaya mainolega kanale'ya huno eteno esie. Agayaene nago'a nafu'nagana'yaene esayafe amakava mainoe.

¹² Apolosi'a nenafufe nehue nago'a nafu'nagana'yaene “Kolini kumate vuo” hu'na hamapaite hamapaite nehuanagi “Menia o'visua nagesa nehianagi'na o'ugahugi haenagama visua kana'ni'ama hanesige'na ugahue.” huno humaine.

Polo'a nago'a atupa kea humaine.

¹³ Ka'yetama mainetama Yisasife havitama lamakupi malenaya yana atafa hutama kolia ohutama lokiya vaitama maiho.

¹⁴ Nelama-fugamifena tamahau tamayamopafi nelahainage-tama muki'a kavala hiho.

¹⁵ Tamakaya Setefanasifena havi-mainae. Kaliki kotega agai'ene agai'a afamo'aene hagote'ya amaku'a aiyahae hute'ya Yisasife havi'ya amakupi malenayapiti muki'a kanafina Yisasi anagala amaya humainae. ¹⁶ Na'a kava humaine'ya Anumaya Koti ali'yana tusiya hu'ya ne'aliya vea'mogami amaiya'afi maiho.

¹⁷ Tamakaya alulega mainetama naha'omaenayanagi menia Setefanasi'ene Fotunatusi'ene Akaikusi'ene nagaitega age'na

naha'nemaeyafe tusi'a muse nehue. ¹⁸ Amakaya tamakaifema me nahapaigeno naipamo'a kanale'ya hige'na muse nehue. Muse nehuafe tamakai tamaipamo'a ani'a huno kanale'ya humaine. Na'a kava nehaya vayafena tusi'a muse hutama amakia alisaga hiho.

¹⁹ Esia kotega alu kumate kumate maine'ya Yisasife havi'ya alitalu nehaya veala “Mainafio?” hu'ya hu falu fala hunelamatae. Akuvila'ene Palisila'ene anakai nopima Yisasife havi'ya melitalu nehaya veala Anumayamo'ene ailokae'ya maine'ya “Mainafio?” hu'ya hu falu fala hu nelamatae. ²⁰ Muki'a mafi mainaya tafu-taganaga'ya “Mainafio.” hu'ya hu falu fala hu nelamatae.

Tamakaya Anumaya Koti anaga mainayafe nagoke nagoke'mogatama tamayana o'ami a'ami hutama maiho.

²¹ Nago'a kea nago kanomona hapaugeno kaemaleneanagi nagaya Polo'na mamona atupa avona nagai'ni nayapiti kae'na nelamamue.

²² Anumayamofe havino hau ayamopafi noma-lea kanomona Anumaya Koti'a ali haviya hutesie. “Anumayatimogae aup'a eno.” hu'na nehue.

²³ Anumayati Yisasi kayone yama'a tamakai'ene hanesie hu'na nehue. ²⁴ Yisasi Kalaisi'ene aiga'mae'na tamakaila naipa nelamamue. Tamage.

Ke'nia male ha'no hie.
Nagai'ni nagia Polo'nae.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea
Nupela Testamen long tokples Kanite long Niugini**

copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 21 Feb 2024 from source files dated 31 Aug 2023

55807fd5-1005-5405-89da-5533a7950c65